

BUNDÙ BWÀ BWALU BWÀ DÎYÌ



Twasàkidila, Mwanèètù Neville. [Mwanèètù Neville ùdi wàmba ne: “Amen.”—Muf.]

Mvwa mwambile Mwanèètù Neville ne: “Ncya bushuwa ne kwênàku ne kaadilaabiibwa nansha kàà kànà mu dinda emu anyì?”

² Mvwa mulwe bwa kusambidila babèèdi. Kùvwa bantu kampànda bakùngwile mu citùdi. . . mu dinda kampànda dya dyalumingu. Bàndi ne cya kupetela kwàka, ndi mèmè anu mbàvwija ku ekeleeziya eku. Ne ntu—ntu misangu yònsò anu ndyàmbidila ne mbitàmbe bwìmpè bwa kusambidila babèèdi mu ekeleeziya. Ncyéna mumanyè to. Mèmè ntu munange ekeleeziya, ne kulwa kaaba aka kàdi disangisha, cisàmbà eci cisambila.

³ Nenku kùvwa mwànà mukese wa bakàji paanyimà pààpa, mwànà mukese wa bakàji mutàmbe bulenga awu’s, mòna’s, ngeela meeji ne mmusòmbè mwab’ewu mpindyewu, piikalàbi ne kì mbaalùkile mwàbò. Kaa, ngàmònu mpindyewu. Ne ki kantu kakese kàà katàmbe bulenga. Kàdi ùdi ùsaama be. Nenku tuvwa tutèeleja, patùmvù mukenji wà mu myakulu ne dyandamuna byènzeke apu. Nenku tuvwa tutèeleja, ne twètù kudyàmbidila ne tuvwa bumvwè ne cintu kampànda cìvwa cyambiibwe bwa mwànà mukese wa bakàji kampànda. Ne tuvwa bindile bwa kumòna Mukalenge ní ùvwa mufile mukenji kampànda, cidi cikèngelà kwamba mwómò amu. Kàdi ndi ngeela meeji ne mwànà mukese wa bakàji awu ùdi bìmpè mpindyewu, ne yèyè neàsangalè. Ne pa nanku. . .

⁴ Kabidi kùvwa inàbànza kampànda uvwa pèndè mujimije lumònù, nenku tuvwa tumusambidila. Ne muntu mulùme kampànda mu màshinyi a cyambula-babèèdi pambèlu pààpa, mwambi. Ncyéna ngeela meeji ne muntu awu ùvwakù mfuwànyine kwikala ne bujitu bwa kilò dikumi ne yisambombo, anyì dikumi ne mwandamukùlù to. Anu—anu mutàmbe, mutàmbe. . . Pa nanku mèmè kulwa bwa kubàsambidila.

⁵ Ne cìvwa cyenzè ne ngùikalèku ne dyelakana, dyàbùngì, cyamù cya mu dìnù dyànyì cìvwa cimatè. Nenku ndi munkaci mwa kudyèlela tushìbà’s, mu dinda emu, pa kiine kaaba kàvwà dìnù aku, kumpàla eku. Ne bàdi bàngambila mpindyewu ne bikèngela nsongeshè ménù, bwa kwashishapù bifulu. Kàdi mbukùlakàji ebu bwènda bùdifinda, s’ki cidiku cindiku mumanyè. Nenku mvwa ne cyamù mu dìnù adi, bu cyàbibidì cìmwè cyàdi, kàdi pàngààbangì kwakula, udi mwa kucyùmwa’s, lupepèlè lwenzè bu lùdi lùpicilamù, nudi—nudi bamanyè cindì njinga kwamba aci, lùpàtùkila ku mishiku eku.

Ne ciine aci cìdi cikwenzeja bu udi wakwila pa mènù's, bu nanku awu.

⁶ Cya bushuwa tudi bantu bàà dyèsè bwa kwikala ne mwoyi mu dinda emu, ne bwa kwikalakù ne mushindu wà kulwa mu ekeleeziya. Nenku mu mulààdilu wà Noël emu, bindile bwa kutwà cyanga cidìbu naaci eci, bìdi ne, ndi—ndi ntèkemena ne ndi. . . Kùdi bânà bapitèpìte bungi kaaba aka mu dinda emu, pa nanku mémè nènshaalè anu mupùwe's. Nwamònu anyi? Ne twètù bantu bakolè, mîngà misangu, tutu twamba bintu bìdi kabiyi bikèngela bwa bânà kutèelejabò to, nudi bamanyè's.

⁷ Kàdi, ngeela meeji ne ekeleeziya ùdi ne kaaditàpishì kakese mwab'ewu bwa bânà bakese, paanyimà pàà katanci. Mvwa anu munkaci mwa kukàkenketa, paanyimà pàapa. Kaa, panùdiku baswè kushààla's. Paanyimà pàà kàlaasà kàà Dyàlumingu, nwánjàayi anu kwindilakù, nwamònu's, bwalu ndi—ndi ngeela meeji ne bàdi ne màtápishì paanyimà pàapa bwa bânà batekète, a kubààbanyinabò mu dinda emu. Nenku pàngiiikalà. . . Nwènù bânà bakese, vùlukàayi ne, patùdi twenza cyòci eci apa, ndi muswè bwa ntookeshè cyòci eci ne, kí n'Taatù Noël nansha, bwalu aci mmwanu wunwikalà mwa kuyiila dîngà ditùkù ne kawèna ne bwa nsongo to. Kadi ncyà kùdi Yesu Kilisto, Bulelèlà bwa malelèlà ônsò, nudi numòna's, Mwànà wa Nzambi. Nenku tudi tunùpèèsha kaaditàpishì kakese aka, mu dinda emu, bwalu cìdi cinùfikisha ku dimanya ne musangu kampànda Nzambi wàkafila ditàpishì dya ditambe bunene divwàku kacya mwa kufidiibwa kùdi bukwàpànu: Mwan'Èndè. Kàdi twètù tudi ne mushindu mushààdile, wa kucijikula. Ne katwènakù ne cintu nansha címwè citùdi mwa kufila cya kufwànyikija ne cyòci aci to. Kàdi twètù anu bu bantu bàà cifwàkà, muntu kùdi mukwèndè, nceitùtu twenzelangana.

⁸ Mpindyewu, mvwa muswè kwindila too ne ku dyàlumingu dilwalwà. Ne mémè mwine pàmwàpà nèngìndilè anu kwindila, bwa cintu kampànda címvwà muswè kwamba. Ne cintu kampànda nci—ncimanyishilbwe kutùdi, kumbèlu, cya mu cikèèna—kumòna, bwa ne ndi ne cya kucilonda. Ne mu mushindu kampànda cìdi. . . Cìdi bu, bwa pa kutàngila, cifwànyine kwikala bu cyúme cyoncyonci, kàdi katwènakù baswè kwela meeji ne cìdi Nzambi wamba ncyúme cyoncyonci to. Majitu Èndè—Èndè mmapeepèle.

⁹ Nenku bu mudìbi ne mu dyàlumingu dilwalwà, bu Nzambi mwa kwanyisha, netwènzè di—disangisha kaaba aka dìdi anu kumpàla menemene kwa Mulààdilu wà Cidimu Cipyacipyà, bu byòbì mwa kusànkisha Mukalenge bwa twètù kwenza diine disangisha adi. Nenku tudi baswè kwenza disangisha dya mu dinda, disambidila dya babèèdi, ne pàmwàpa mudimu wà dibàtiiza. Dìbà adi mvwa ngeela meeji, kucimanyisha kùdi balundà beetu, bwa bààmònakù mwa kulwamù. Dìbà adi netwàngatè dyàlumingu mu dinda ne dyàlumingu dilòòlò. Nenku

dìbà adi bantu bìikalà baswè bwa kushààla too ne ku Cidimu Cipyacìpyà abu, dìbà adi tudi ne. . . Netwikalè mwa kwenza Nèishà anyì, musangu ewu? [Mwanèètù Neville ùdi wàmba ne: “Eyowa.”—Muf.]

¹⁰ Nekwikalè bambi bààbùngì kaaba aka, bìikalà mwa kuyiisha mu bufùkù bwa Cidimu Cipyacìpyà amu, too ne mundankùlù. Nenku—nenku tùdi tubiikila bambi bàà mushindu awu bwa kulwabo kuyiisha. Bu Mukalenge mwa kwanyisha, ndi muswè kwikala umwe wa ku bàdìku ne cintu kampàndà cya kwamba bufùkù bwa Cidimu Cipyacìpyà abu.

¹¹ Nenku pashìishe dyàlumingu dyàlondà, mvwa mwelè meeji ne ndi mufwànyìne kutwàla bintu bilondàngàne bìdì munkacì mwa kwenjiibwa, bikaadi byenjiibwe, kuleejakù mùdì Nzambi ùkwàta mudimu ne cisàmbà Cyèndè, ne kubifikisha buludi mu—mu katòngòbèlè mu ekeleeziya emu.

¹² Ne bààbùngì bàà kunùdì bàdì bàdìkonka bwa bwalu bwa bitàdì bùvwà butùkwàte ebu. Bwàmányì kulongolodiibwa. Kabidi ndi muswe kunwàmbla mùdì bwalu abu bupitàkàne. Ne ndi ngeela meeji ne, mbifwànyìne kwikala ne, bwa bikèngela kucyàmbulula, mu dyàlumingu dyàlondà, pa nanku nèngìdìlè anu too ne ku dyàlumingu dyàlondà adi. Nenku nènteetè bwa kwakulakù neenu ndambu mu dinda emu, mu Díyì. Nwamònu anyì? Nenku mu dyàlumingu dyàlondà adi, nè—nènteetè, bu Nzambi mwa kwanyisha, bwa kunwàmbla mùvwà byònsò abi byenzèke, ne kunùtwàdila cyònsò cya ku bintu bìdì Mukalenge mwambè, ne kutàngila kumòna muvwàci cikùmbàne anu menemene, citèèkìibwe anu menemene pa kaaba kààci. Nwamònu anyì? Yèyè kàtu wàmba kantu nansha kàmwè kàà mafi nansha.

¹³ Kàdì, bwa mpindyewu, cintu cimwè cìndì njinga kwamba mu dinda emu, pàmwàpa cìngàbèngà kwamba, cìngàbèngà kwamba mu dyàlumingu dyàlondà, ncyà bwalu bùdì bwenzèke makèèlèlè awu. Mvwa ne mwoyi mukwàcìdìle ndambu mu dilwa dyànyì mu dinda emu, bwalu mvwa cya bushuwa bu ne lungènyì lùndubakana, mu mushindu wà ne ncyèna—ncyèna ntàmba kudyùmvwà bimpè bwa cyòci aci to. Kàdì bu mùdìbi ne ndi kaaba aka, ee, nènteetè ne mwànyì mwònsò.

¹⁴ Dilòòlò dya dyàbwàbwa, bàvwa balwè kunsòmbesha, kùdì Mwanèètù wa balùme ne Mwanèètù wa bakàjì Sothmann, mutùdì bamanyè kaaba aka, umwe wa ku balubuludi bàà ekeleeziya, ne mukàjèndè, balwè bwa kunkùmbulakù mèmè ne mukàjàanyì. Nenku tuvwà twakula pa masangisha ìkalà mwa kwenzeka mu Phoenix ne mu nyùngulukilu amu, pìikalàci diswa dya Mukalenge. Nenku twètù kushààla batàbàle too ne pa dìbà dikumi wa bufùkù ne tusunsa makumi asatu, ngeela meeji, ki mèmè kuya kalààla lwà pa dìbà dikumi ne ùmwè.

¹⁵ Ki pa dîbà kampànda bufùkù abu, mêmè kulòòta cilòòtà. Nenku mu ciine cilòòtà aci mêmè kumòna muntu mulùme uvwa ne ntatwányi; muntu munene, wa katankù, mwikàle, mu ngaakwilù wa difwányikija, bu tatwányi. Mêmè kumòna muntu mukàji, kàyi mufwànàngàne ne maamù wanyì to; kàdi, nansha nanku, uvwa bu mamwányi. Nenku muntu mulùme ewu (uvwa bu tatwányi awu, bàyendè wa mwine mukàji ewu awu) ùvwa ùmukisa ne cikisu cyònsò, mu mushindu wà ne mulùme ewu ùvwa ne citùpà cinènè cya mucì, ne ùvwa ùmwambulwila kuulu mushindu *ewu* ne ùmutuuta ne citùpà cya mucì aci, ne mukàji awu ùvwa ùteketa ne ùdishinda panshì. Ne pashiishe—ne pashiishe, paanyimà pàà katanci, mukàji awu ùvwa ùjuukuluka kabidi. Ne mulùme awu ùvwa ùseemena, ùdilongolola bwa kumutuuta cyàkàbìdì, ùmutuuta cyàkàbìdì. Kàdi mêmè mvwa mwimànyine kule mu ntàntà kampànda, mbandila bwalu abu.

¹⁶ Ndekeelu wa byònsò, mêmè kuumvwa anu cintu aci cintondè. Kàdi mvwa mukese kùdì muntu ewu kule ne kule, mwine uvwa bu tatwányi awu. Ki mêmè kuya tàmàkàtàmàkà too ne kùdiye ne kumufunkuna munu mumpàla. Mêmè kwamba ne: “Kùmutuutù kabidi nansha.” Nwamònu anyi? Nenku ndi mwenzè anu ngamba nanku anyi, cintu kampànda kubanga kwenzeka. Mabòkò àànyì kubangawù kupàtakana, ne mêmè kulwa munene, ne mahùndà manène a bukolè. Kacya ncìvwakù mwanji kumòna mahùndà a nàka to. Nenku mêmè kukwàcila muntu awu ku dicitù dya mutèèlu, kwamba ne: “Kùmutuutù kabidi to. Wèwè mudidìnge anu mumutuutè, nèubwelakanè naanyì mêmè wèwè anu mumutuutè kabidi.” Ki muntu awu kungumvwayè bwòwà, ne kulekelayè mukàji awu. Mêmè kutàbuluka.

¹⁷ Ee, mêmè mudyàdije mwaba awu, mu katanci kakese cyanàànà, mu bushuwa bwa bwalu, dyumvwija dya cyòcì aci kulwadì. Mu bushuwa bwa bwalu, bìvwa ne, mukàji awu, mu ngaakwilù wa difwányikija, ng’Ekeleeziya, udi mwenze bu ne mmaamù awu. Taatù awu ndingumba òvwa ne bukòòkeshi pa mukàji awu, diti ne bukòòkeshi pa Ekeleeziya, mùdì mulùme naabù pa mukàjèndè amu. Nenku mmàngumba aa àdì àtuuta Ekeleeziya awu, ne kaayi àMushiyakù mwimane Yèyè kuulu mushindu awu to. Anu ne, musangu wònsò wùdìYè ùteeta kujuukila kuulu anyi kwenza cintu kampànda, bòbò, bantu bàdì mwòmò amu abu, òngumba adi diti dìmubyànkula panshì. Nenku cidi anu cyùmvwija kusonsola kwa ndambu—ndambu wa mahùndà a diitabuujà àdì emu bwa kulama munu wànyì mufunkuna mwaba awu, ngamba ne: “Nèubwelakanè naanyì.” Nwamònu anyi? Bwalu, kùdì bantu muntwamu bàdì bàà Nzambi. Nenku bìvwa bimpè. Bu . . .

¹⁸ Tuvwa bashààle batàbàle munda mwa mēbà bu abidi, anyi asatu, ngeela meeji. Ki mwanàanyì wa bakàji, umwe wa kùdibo, Rebekah, udi paanyimà pààpa wàwa, yèyè ùtu

wènza mudimu mu Lùpìtaadi lwà ba-Méthodistes mu Louisville. Cìdi, kaa, mushindu wà dilongeshiibwa dya buumingàngà bàà twânàtwânà abu. Cìdi “badiswilè,” mùdibo bàbàbiikila, anyi cintu cya mushindu awu. Nenku ùvwa, yèyè. . . Bòbò kumubiikila bwa kulwayè mu dinda amu, ne cyòcì aci ki cyàkampakulà. Kadi kùcivwa anu bwebwebwe, nenku yèyè, pàmwè ne mulongi nendè kampànda wa mutekète awu mwab’ewu, bàdi—bàdi bènzamù mudimu pàmwè, ne mvwa ne cya kubàngata kuya naabo mu Louisville. Bìvwa bikèngela kwikalabò kuntwaku pa díbà dikumi. Ki mukàjàànyì kudìkonka bwa cinyì kàvwa mwa kubwela mu nzùbu wa bulààlù. Mvwa mukàngekù ne nsapi.

¹⁹ Mpindyewu, nkààdikù mupetèpète bintu byàbùngì byenzèke mu nsòmbelu wanyì, kàdi kacya ncitukù mwanjì kupeta cintu cya mushindu awu to. Mémè kubwela mu nyuma. Ncyèna mumanyè dyumvwija to. Ncitu mwanjì kupeta cintu cya mushindu awu to kacya bándela. Kàdi, kumpàlà kwànyì aku, bìvwa byenzè bu ne ngákamanya ne civwa cikèèna-kumòna, ne mvwa mu cikèèna-kumòna. Kàdi mvwa ngaakula ne mwanànyì wa balùme, Joseph. Kàdi yèyè, kàvwa mu cibambalu amu pa díbà adi to. Kàdi nansha nanku, pàndengici apu, mvwa ngaakula ne Joseph.

²⁰ Ki mémè—mémè kubànduluka. Nenku byenzè bu mu mushindu wa cipaapu cya musàkà, kumpàlà kwànyì, kùvwa kwimàne tunyuunyi tukese, tukese, tuntu twà bule bu bwa centimètre umwe. Nenku twòtù atu tùvwa, kuulu ku lusongo aku, pa matàmbà apu, pàvwa. . . ndi mwa kwamba ne, tusatu anyì tunaayi. Pashiishe, ditàmbà divwà dilondèle, divwà dilondèle divwa naatù pàmwàpa mwandamukùlù anyì dikumi. Ne dya kwinshì ku ntàku, divwa ne dikumi ne tutaanu anyì makumi abidi.

²¹ Nenku tùvwa tulwanganyi twà mvità twà tukese, bwalu masàlà àtù àvwa masalùke, ne tùvwa tùmwèka bu ne tùvwa tùteeta kuyiikila naanyì, twàmba cintu kampànda. Kàdi mvwa ku Wesètè, byenze bu lwà ku Tucson, mu Arizona. Kàdi tunyuunyi atu tùvwa tutàngile ku Esètè. Nenku mvwa mutèèlèje ne ntèmà yònsò. Tùvwa tùteeta kwamba, bìmwèka bu ne tùvwa tùteeta kungambila cintu kampànda. Nenku tùvwa ne tuumasàlà tukese, tusalàkàne twònsò, ne bikwabo. Tùvwa ne mpùtà ya milengu ya ku mvità. Pashiishe, dyàkàmwè, kanyuunyi kàmwè kubangakù kwangata mwaba wà kakwàbò, kàtùpika mushindu *ewu*. Ki twòtò atu, tunyuunyi tukese atu kuumukatù lubilu lukolè, kubùukatù tutàngile ku esètè.

²² Ne pààkayàtu, ki kulwakù nyuunyi mutàmbe bunene, mitàmbe kufwànangana ne nkuci, ne mapwàpwà masongòlòke. Nenku—nenku—nenku yàkalwa mu cisumbu, lubilu lukolè, ne lubilu lukolè kutàmba lwà tunyuunyi tukese atu, kubùukayì mitàngile ku esètè.

23 Ne ncívwa anu mu...twòndò twànyì twà mwoyi tubidi pàmwè, mvwa mumanyè ne mvwa mwimàne apa, kabidi mvwa mumanyè ne mvwa mu mwaba kampànda mukwabo. Nwamònu anyi? Ki mèmè kudyàmbidila ne: “Mpindyewu, eci’s ncikèèna-kumòna, ne ndi ne cya kuyiila cidi cyòci eci cyùmvwija.”

24 Nenku kasùmbù kiibìdi kàà nyuunyi aku nkenzè anu kàlwa, mèmè kutàngila ku Wesètè. Nàнку bimwèke bu mu mushindu wà cipaapu cya musàkà, byenzè bu babidi ku luseke lwònsò, ne umwè ku lusongo, kulwakù bataanu bàà ku Banjelo bàà batàmbe bukolè bàntù ncíyikù mwanji kumòna to kacya bàndela. Lubilu lukolè lwà mùsà, lùntù kacya ncíyikù mwanji kumòna to. Mitù yàBò mitùma paanyimà, ne mapwàpwà àBò masongòlòke, anu munkaci mwa kubùka lubilu! Ne bukolè bwa Nzambi wa Bukolè bwònsò kundengabù, mu mushindu wà ne, Bwàkantùntumuna e kunguumusha pa buloba, kule ne buloba, kumbàndisha muulu.

Mvwa ngumvwa Joseph mucìkalè anu wàkula.

25 Ne cyonà cyenzè bu dipanda dya cimanu cipùmbishi cya dìyi, cya ne—cya ne mukungulu munene mmwenzèke, kule mu ntàntà, ku Sud. Nenku pàngàakatùntumunyiibwà apu... Ne kùvwa lubilu lukolè lwà mùsà lwà Banjelo abu! Ne ndi—ndi anu mwa kuBàmòna mpindyewu mene, nwamònu’s, pà—pàvwàBo bènda bàlwa apu, mu mmwènekelu awu mushindu ewu, bàlwa anu lubilu buludi kùndi.

26 Kàdi, ncíyi ndòòta to, mpindyewu. To. Mvwa anu mwaba awu mene, mutàbàle anu mùndi mpindyewu emu. Nwamònu anyi?

27 Kàdi ki Cyòci cyàkalwà aci. Ne Bàvwa balwe ne lubilu lukolè lwà mùsà, mu mushindu wà ne ngàkadyàmbidila, pààkantùntumunàCi apu... Mèmè kuumvwa dikùbàkùbà adi, bu, anyì bu dikùbàkùbà dyenzèke, bu cimanu cipùmbishi cya dìyi. Ne pààkenzàci nanku, mèmè kudyàmbidila ne: “Ee, eci cidi ne cya kuumvwija ne ndi pabwìpì ne kushipiibwa, wamònu’s, mu dikùbàkùbà dya mushindu kampànda.” Nenku—nenku ndi anu... Pàncívwa ngeela meeji ku bintu abi apu, mèmè kudyàmbidila ne: “To, kí ncifwànyine kwikala aci to. Bwalu, bu ne cívwa ndikùbàkùbà, nùнку ndyangàte pèndè Joseph. Bwalu, s’nyèyè wàwa, mucìkalè anu ùyiikila, wèla meeji ne ndipù. Ndi mwa kuumvwa. Kacívwa aci to.”

28 Mpindyewu, byònsò ebi bicidi anu mu cikèèna-kumòna. Kacívwa... Nwamònu anyi? Cívwa mmu cikèèna-kumòna.

29 Ne pashìshe, dyàkàmwè, pàngàakamanyà ne mvwa... Bàvwa banyùngùlùkile. Ncívwa mwa kuBàmòna to, kàdi ngàkabwejiibwa mu kasùmbù kààBò kàà cipaapu cya musàkà aka, munda mwa kasùmbù kàà—kàà Banjelo, bataanu aku. Ki mèmè kudyàmbidila ne: “Mpindyewu, Mwanjelo wa lufù’s mmufwànyine kwikala umwèpelè. Bataanu mbafwànyine kwikala ngàsà.” Mvwa ndyàmbidila nanku awu. Mèmè

kudyàmbidila ne: “Kaa! Cìdì—Cìdì cìlwa ne Mukenji wànyì. Kì katòngòbèlè kàànyì kiibìdì nkòkò aku. Bàdì bàlwa bwa kuntwàdila Mukenji wà kùdì Mukalenge.” Kì mèmè kwela lubilà lukolè ne bukolè bwànyì bwònsò, ne dîyì dikolè ne mwànyì mwònsò ne: “Éyì Yesu, ncinyì cyŪdì muswe bwa ngénzè?” Nénku pàngàakambà nanku, kì kumbà—kumbà kunguumukaCì.

³⁰ Ncyèna—ncyèna—ncyèna ndyùmvwà anu bìmpè mu mèmè to, kacya piine apu. Nwamònu anyì? Mvwa, ditùkù dijimà makèèlèlè awu, kukèngelabì bwa mèmè kushààla mu nzùbu, ndyùmvwà anu bu ncìyì mu mèmè to. Ncyèna ne mushindu wà kutòkeshà lungènyì to. Ne butùmbi ne bukolè bwa Mukalenge! Mvwa mushààle mèmè yònsò bu mukwacìke tukùlàkàjì, pàakanguumukàCì. Mvwa nteeta bwa kudikùpula ku byanza. Kì mèmè kudyàmbidila ne: “Ncyèna nansha mwa kupingaja mweyelu mu wòwò to.” Kì mèmè kwenda nyùnguluka, mwaba wònsò awu, ntwà kumpala ntwà paanyimà. Mèmè kudyàmbidila ne: “Cìdì cyùmvwija cinyì, Mukalenge? Cìdì cyùmvwija cinyì?” Dìbà adi, mèmè kwimana. Mèmè kwamba ne: “Mukalenge Nzambi, musadidi Webè ùdi... Ncyèna—ncyèna anu mwa kuumvwà to. Bwa cinyì? Cìvwa ncinyì? Cìmanyishèku’s, Mukalenge.” Ee, pàvwà... .

³¹ Ncyèna mwa kunulondela, pàndi ngamba ne: “Bukolè bwa Mukalenge” apu to. Kakwèna mushindu wà kucyùmvwija to. Kì ncinùdì nudyùmvwà apa aci to, mu mabènesha. Aci mmabènesha a Mukalenge. Eci ncinsantu! Kaa, ekelekele! Ncipite—ncipite kule ne kule cintu kanà cyònsò cìdiku muntu wa cìfwàkà wetù ewu mufwànyìne mene kudicinkila. Nwamònu anyì? Nénku cìvwa—nénku cìvwa cìntàcìsha, bibì be. Kacyèna... . Kì ndibènesha to. Nditàcìshiiibwa. Wèwè’s udi ne meeji àtata. Nwamònu anyì? Kì mùdìbi nanku. Bu ne nuvwakù bafwànyìne... .

³² Bu ne mvwakù anu mwa kupeta mushindu kampànda wà mèmè mufwànyìne kulondela bantu cìvwà cyòci aci, anyì cìvwà... .cìvwà dyumvwà dyàci’s wè! Cyòci, kacyèna anu mùdì kusòmba kaaba aka, uswà bwa kucyònkomoka to. Cìdì—cìdì ncintu kampànda cìdì kajilujilu kònsò kàdì mu wèwè anu... . Ncipite dicitàna kule ne kule. Ncipite bwòwà kule ne kule. Nkaneemu kàà cijila. Kàà... .Ndi... .Kakwèna mushindu wa kucyùmvwija to. Mene, mu mushindu wà ne, mwongo wànyì mujimà ewu, kuulu ne kwìnshì kwa manungu a mwongo, kupìcila mu minu, kubànda ne kupweka pa makàsà ne bàna bàà nkàsà, mèmè yònsò mvwa anu mukwacìke tukùlàkàjì, nwamònu’s, anu bu ne uvwa—uvwa muumùke pa buloba, muyè mwaba kampànda. Nénku—nénku cìvwa cìnguumuka, ku kakese ku kakese, kì mèmè kwambila—kwambila Mukalenge ne: “Udikù anu mwa kuswà kummanyisha anyì, Éyì Nzambi?”

³³ Ngeela meeji, ne, cya citàmbe kuseemena cikaadiku cilwè cyàkàbìdì ne bukolè nanku, mpàmvwà mu Zurich, mu Suisse,

musangu awu pàakandeejàYe Mukankù wà cyena Allemagne mwikàle wùbandila mubàndi wa pa kabalù wa ba-Anglais uvwa ùkòsolwela mu Afrike awu. Ki kwambaYe ne: “Bònsò mbenzè mpekaatu ne mbapangile butùmbi.”

³⁴ Ne mvwa ngeela mbilà kùdi Mukalenge, bwa ànkwaçisha. Ne ndi—ndi muswè bwa Yèyè àmpèèshè dyumvwija, bwalu mvwa ndikonka ní civwa cyùmvwija—ní civwa cyùmvwija ne mvwa nguumuka nya, mvwa nshipiibwa. Ne bu ne bivwa nanku, ncivwa ngambilakù beena díkù dyànyì kantu nansha kàmwè pa bwalu abu nansha. Ncikondo cyànyì cya dyalukila Kumbèlu, mòna’s, nèngàalukilè anu Kumbèlu, ki cyònsò cidiku pa bwalu abu. Kàdi byòbì—byòbì ne ki civwàci cyùmvwija, ncivwa muswè kwambila beena díkù dyànyì to, ncivwa muswè bwa bàmanyè kantu nansha kàmwè pa bwalu abu to. Byènzekè anu nanku, ne ki—ki cyònsò civwà cifwànyine kwikalakù aci’s.

³⁵ Mémè kwamba ne: “Mukalenge, nkwàcihèku. Ncyèna muswè kwambila beena díkù dyànyì to, byòbì ne—byòbì ne Wèwè udi. . . Eci, ndibìikidiibwa dyànyì bwa kwalukila Kumbèlu, ee, nè—nèngìikalè mwa kuya.” Nudi numòna’s. Mémè kwamba. . . Nenku, nudi bamanyè’s, nudi. . .

³⁶ Wèwè udi wamba ne: “Ee, kùvwa mwelè meeji ku cyùvwà mwambè mu cikèènà-kumòna, civwà cikèènà-kumòna cyambè aci bwa cinyì?”

³⁷ Kàdi kwèna mwa kwela meeji ku bintu bu nanku díbà adi to. Wèwè. . . Ncyèna mwa kukwèlela meeji to, byòbì biine. Nenku mvwa ndyàmbidila. . . Mvwa anu ndubakana cyanàànà, mubìndùlùke. Kwèna umanya mwa kwela meeji to. Kwèna mwa kwela meeji to.

³⁸ Ki mémè kwamba ne: “Taatu wa mu Dyulu, piikalàci cyùmvwija ne dikùbàkùbà adi—adi divwa dingangata, ee, ùmmanyishèku mpindyewu, bwa ncyàmbi kantu pa bwalu abu to. Enzàku bwa butùmbi ne bukolè Bwebe bimpwekèlè cyàkàbìdì, ne bintùntùmùnè cyàkàbìdì. Anyì, enzàku bwa butùmbi Bwebe bùlwe pambidi pàànyì, ne díbà adi nè—nèmanyè díbà adi ne ki civwàci cyùmvwija—ki civwàci cyùmvwija, nenku ndi mwa kucilamina bwànyì mémè nkayàànyì.” Kàdi cintu nansha cimwè kí ncyenzèke to.

³⁹ Pa nanku mémè kwamba ne: “Dìbà adi, Mukalenge, cyòci cyùmvwija ne neÛtumè Baamisànjeelà Beebe bwa mudimu muntùma naawù, nanku enzàku bwa bukolè Bwebe bùlwe cyàkàbìdì.” Ki kwambabù kungiimansha pambèlù pàa cibambalu aci’s!

⁴⁰ Nansha nanku, ndi—ndi mwalùkile mu mémè, ne Bible wanyì mu cyanza, díbà adi, nwamònu’s, ne munkaci mwa kulòmba Nzambi bwa kungambulwisha. Ne pàngenjì nanku, Yèyè—Yèyè kundeeja cintu kampànda mu Mifundu, citàngile bwalu abu mene, anu mwaba awu. Ki mémè kudyàmbidila ne:

“Ncifwànyine cya bushuwa kwikala cyôci aci anyi? Ndi mwenzè ciine aci munyi?” Nenku, kaa, ncyèna—ncyèna mwa kuumvwija bintu ebi to, balùmyànà. Mbitàmbe kule ne kule cintu kanà cyònsò cîndîku mumanyè. Nwamònu anyi?

⁴¹ Mukàjàànyì mmukàji wa pabwèndè wa dikèma, umwe wa ku bàà batàmbe bwîmpè pa buloba. Kàdi, nkwenzè ntàntà, ncivwa mubùtèèjekù to. Mémè kutùngunuka nanku. Yèyè ùvwa mumanyè ne kùvwa cintu kampànda cyenzèke. Pa nanku pàngàamwambidi, kwambayè ne: “Udi mumanyè’s, Bill, ntu nkumòna ne nkutèèleja, mu byàbùngì bya ku bintu abi.” Yèyè ne: “Wèwè’s udi mumanyè ne ntu nkwitabuuja ne mwoyi wànyì wònsò,” mwàkambàye. Yèyè ne: “Kàdi ncyà bushuwa ne aci civwa ne bwalu kampànda mu cyôci.”

⁴² Bwa pa kutàngila, cidi anu cînyùkusha, dikùbàkùbà adi ne dilwa dya cîmpicîmpi dya Banjelo abu mushindu awu, bataanu cyàpàmwè, mu—mu cisùmbù cyàbò aci. Byenzè bu, anu bu—bu mùngààkazòlà cipaapu cya musàkà aci kaaba aka, nwamònu’s, bàvwa bàmwèka bu ne, kumpàlampala, bàvwa bàmwèka bu, bu ne. . . mu ntàntà, bàvwa bàmwèka bu bàà diikala dya nyuunyì ya nkuci. Ne bàvwa mu—mu dilwa dya mu *nùku* ewu. Ne bàvwa, bàmwèka bu, umwe, babidi; basatu, banaayi; ne pashìishe umwe buludì ku lusongo, nwamònu’s, bènza bataanu. Ki kulwabò ne lubilu lwebe lwà dikèma! Kakwèna cintu nansha cimwè, ní ndèkè ya jets, anyi cintu cikwabo cidi mwa kupàlakanangana ne cyôci aci to.

⁴³ Ne mémè ndi anu mwa kubàmòna, ne mitù yàbò myenzè bu mitùma ku luseke. Mapwàpwà awu moolwela paanyimà, mambùle bya mvità, nenku ki bòbò bàlwalwà aba, bènza ne “Hyu!” Mushindu *ewu*. Kupweka anu buludì, ne kungangata e kumbweja buludi mu cipaapu cya musàkà cya cisùmbù cyàbò aci. Mémè kudimòna mutùntùmùnyìbwe, kuulu kule ne buloba. Mémè kudyàmbidila pàmwàpa. . . Mémè kuumvwa, mu ntàntà mule, mukungulu awu ne: “Wuum!” Cyenzè bu ndè—ndè—ndèkè pàdiye ùpita cimanu cipùmbishi cya dîyì, nukàadi bacyùmwè cyènzeka nanku, cyenzè anu bu mukungulu mu ntàntà mule.

⁴⁴ Mémè ne: “Eci cidi mwa kuumvwija mpindyewu, pànguumukà cìkèèna—kumòna eci mpindyewu, ne nènshipiibwè ku dikùbàkùbà anyi cintu kampànda.” Mémè kudyàmbidila ne: “S’ki mémè ewu. Ndi mutùntùmùnyìbwe. Ndi. . . bòbò, bàdi kaaba aka mwaba kampànda, ndi—ndi mu cyôci eci, cipaapu cya musàkà cya Banjelo eci kaaba aka. Kàdi, ncyèna—ncyèna mumanyè to. Pàmwàpa Mukalenge ùlwalwa kungangata bwa kwalukila naanyì Kumbèlu.”

Dìbà adi mémè kuumvwa Joseph kwàka, wàmba ne: “Papa?”

Mémè kudyàmbidila ne: “To, byòbì nanku, nùku’s ncimwangàte, ne yèyè pèndè.”

45 Dìbà adi Cintu kampànda kwambaCì ne: “Wèwè...” Vùlukaàyi ne, mèmè ndi mwindile, mwindile Mukenji wùntù misangu yònsò anu mutàngile bwa kumòna, cintu kampànda.

46 Nenku cìkèèna-kumòna aci, ditùkù adi, nudi bamanyè’s, mùmvwà mucipetè kaaba aka anu abidi àdi panshi aa, ciikàle cingambila bìvwà mwa kwenzeka, mùmvwà mwikàle nyiisha mu, nyiishila mu dìbà, mwab’awu. Ki—ki pashiishe kwambaYè ne: “Mpindyewu vùlukà ne, katòngòbèlè kiibìdì kàcìdì kàlwa.”

Mèmè kudyàmbidila ne: “Nekwikalè Mukenji kampànda.”

47 Nudi bavùlùke Mukenji wànyì kaaba aka anyi? Dikàngula dya dibwe dya mùsongà adi, mùdì, mèyì mwandamutekète awu ne bitampì bìdì kabiyi nansha mene bifùnda mu Dìyì dya Nzambi abi. Nudi bavùlùke anyi? Nenku kumbwejacì mu cipaapu cya musàkà aci.

48 Nenku Junie Jackson, pawikalà kaaba aka, cilòòtà cyùvwà mumpèèshe abidi àdi panshi aa aci. Ncyàkucyàmba mu dinda emu to. Wèwè uvwa . . . Nzambi ùvwà mupwàngàne anu menemene. Kàdi ùmfwilèku luse bwa mùndì nciyi mukupèèshe dyumvwija; bwalu, mvwa mumòne cintu kampànda cìkwàta mudimu.

J. T., cintu cimwecimwe aci, nwamònu’s. Kàdi mvwa—mvwa—mvwa mumanyè nanku.

Ne Mwanèètù wa bakàjì Collins, cintu cimwecimwe aci menemene. Nwamòmu anyi?

Nenku bisambombo bya ku byòbì abi, bilombola buludi ku cintu cimwecimwe aci.

49 Ne pashiishe cìkèèna-kumòna cìmvwà munùlondèle bònsò aci, kùkaadi bidimu, ncyenzèke anu ditùku adi. Nwamònu anyi? Cìvwà mwa kwenzeka.

50 Nenku’s ki cyòcì aci, citèkèkìbwe, byònsò bitèkèkìbwe anu mwaba awu mene. Cìdì anu cintu kampànda ciikàle cìkwàta mudimu. Ncyèna mumanyè cìdìcì to. Nzambi ànkwaçishèku; ki disambila dyànyì.

Tùsambilààyi.

51 Taatù wa mu Dyulu, twètù tudi—tudi anu bàà cifwàka, kàdì ki twètù aba biimàne mu dinda emu. Nenku, Mukalenge, ndi. . . Wèwè ngudi muntùme bwa kulombola kasumbù kakese kàà mikooko aka ne ekeleeziya ewu. Kadi ndi ku ndekeelu wanyì. Ncyèna mumanyè ne nnjila kaayì, ncinyì, mpenyì, ciine cilwalwà to. Kadi ndi mumanyè cintu cimwèpelè eci, ne, Wèwè utu mwambè ne neWènzè bwa “byònsò bikwacishanganè bwa dyàkalenga dya bàdì” baKunangè ne babiikidìbwe bilondèshile kiipàcìlè Keebe. Nyewu nKulòmba, Nzambi, bwa cianza Cyebe cinènè cya luse ciikalèku pambidi pèètù.

⁵² Tudi bulelèlè bamanyè ne Wèwè udi Nzambi. Ne tudi bamanyè ne Wèwè kwèna ewu wâkadikù ne mwoyi mu matùkù àkaadi mapite to, kàdi Ucìdi kabidi ne mwoyi leelu. Uvwa misangu yònsò anu Nzambi. NeWikalè anu Nzambi misangu yònsò. Uvwa Nzambi kumpàlà kwa cikondo, ne neWikalè Nzambi pìikalà cikondo kacìciyiku. NeWikalè anu Nzambi.

⁵³ Ne twètù tudi mu byanza Byebe, Mukalenge. Twètù tudi anu diima, ne Wèwè ki Mufwìmbi, Mufwìmbi wa mabùngù. Fwìmbakù nsòmbelu yetu, Mukalenge, mu mushindu wùdi mufwànyine kukùmbaja mudimu mutàmbe bwìmpè bwa kuKupèsha luumù. Enzàku nanku, Taatù. Tudi anu mu byanza Byebe.

⁵⁴ Katùvwakù ne mushindu wà kudifikisha twètù biine kaaba aka to, anyi katwèna bamanyè mutwàpàtukà to. Mukalenge, Wèwè ngudi utupèèsha mwoyi, ne Wèwè ngudi ne...Tudi tuKwalujila myoyi yetu, ne, mu nanku, Wèwè udi mutupèèshe, bwa kushintakaja, Mwoyi wà Cyendeleele. Diitabuuja dyetu didi dìpuuyakana cyòci aci mu buumùntù bwetu mene. Ne tudi baKunangè bwa cyòci eci, bwalu tudi bamanyè ne dngà ditùkù netùKumònè, ne neWikalè mu butumbi Bwebe. Ne netùMujoojè. Ne tudi tujinga kuumvwakù mèyi awu ne: “Mbyenjùbwe bìmpè, wèwè musadidi Wanyi mwìmpè ne wa lulamatu. Bwelàaku mu masànkà a Mukalenge, àvwà makulongolwela kacya ku difùkà dya dyulu ne buloba.” Too ne ku ciine cikondo aci, Èyi Nzambi, patwàsangilà bònsò, tùlombòlèku.

Tudi basadidi Beebe, ne tudi tulòmba difwidiibwa dya luse ku mpekaatu yetu.

⁵⁵ Bikèènà-kumònà bya bukolè ebi, Mukalenge, mbipìcile musadidi Webè. Ndi mupange cya dyenza. Ndi—ndi anu mumanyè ne mbilwè. Ne ndi mwa kwamba anu cìndi mèmè mumòne, ne civwà cyambiibwe. Ne mngà misangu cìtu cingenza bwòwà, Mukalenge. Ne ndi—ndi ndìkonka cya dyenza.

⁵⁶ Dìbà adi ndi ngangata Bible ne mbalamù mùvwà Yeshàayi ne cya kwikala mudyùmvwè ditùkù adi mu ntempèlù, pààkamònàye Banjelo abu, ne mapwàpwà mabwikile makàsà Àbò. Kabyèna bikèmesha to pààkeelàye lubilà ne: “Dyàkabi dyànyi! bwalu mèsù àanyi àmònu butùmbi bwa Mukalenge.”

⁵⁷ Ne pa dìbà adi mpàakeelà mupròfetà lubilà lukolè: paanyimà pàà yèyè mumanè kukezudiibwa mu ntempèlù, pààkangatà Mwanjelo lukwàtù ne kwangata dikàlà dya Kapyà ne kumutèekadi pa mishiku; paanyimà pàà yèyè mumane kutonda mùvwàye muntu wa mishikù mikooyike, ne musòmbè pàmwè ne, munkaci mwa bantu bakooyike. Kàdi, pèndè's ùvwa mupròfetà. Mwanjelo kwangata lukwàtù ne kumutèeka dikàlà dya Kapyà pa mishiku ne kumukezula, wàmba ne: “Mpindyewu ndàaku, wàmbe cipròfetà.”

Mukalenge Nzambi, Yeshààyi wàkeela lubilà ne: “Ki mèmè ewu, Mukalenge. Ntùmáku.”

⁵⁸ Dìbà adi, pàakambàYe ne: “Watùyiila nganyi?” Bwa lukòngò lwa beena lwonji ne beena masandi alu’s!

⁵⁹ Éyi Nzambi, cyèzekèku cyàkàbìdì’s. Cìlwekù cyàkàbìdì, Éyi Mukalenge. Tùmakù Nyuma Mwîmpè ne Kapyà kakezudi aku. Bwalu, mèmè ndi ntonda ne, ndi mwena mishìkù mikooyike, ne ndi musòmbe pa buloba apa pàmwè ne bantu bakooyike. Ne twètù tudi bakooyike ku mèsù Kwebe, Mukalenge. Kàdi, kaa, tùmakù bukole bukezudi, Nyuma Mwîmpè awu! Tùkezùlèku, Éyi Mukalenge. Kezùlàku musadidi Webè, Mukalenge.

⁶⁰ Ne pashìshe akùlàku, Mukalenge. Musadidi Webè mmutèlèje. Ndi njinga kuumvwakù Dìyi adi. Ndi Webè. Kwàtakù naanyi mudimu, Mukalenge, mŪdì umòna ne mbikùmbàne amu, pàndi mudyàdije mèmè mwine pa cyoshelu Cyebe apa. Nyuma Mwîmpè ànkezùlèku, Mukalenge; ne àndaabè maanyi ne àntùmè, Mukalenge, paWìkalà muswè bwa muntu kampànda kuyayè, pìikalàbi ne edi ki dìbà diine ne eci ki cikondo.

⁶¹ Ncyèna—ncyèna mumanyè to, Mukalenge. Ndi—ndi mumanyè anu ne mvwa mumòne Banjelo abu. Ne Wèwè udi mumanyè ne maalù awu m’Bulelèlè bwa menemene. Nenku Mukalenge, nyewu nsambila ne: “Dyàkabi dyànyi,” nenku nkwàcìshèku.

⁶² Ne mpindyewu bèneshàku cisàmbà eci. Ne nyewu tudi kaaba aka leelu, anu mu mulààdilu menemene wà cikondo cya cyanga cya dilediibwa dya Mukalenge wetù eci. Tudi tuKulòmba bwa ùtùkwàcìshèku.

⁶³ Ne mu dinda emu, musadidi Webè, Mwanètù Neville, mmudyùmvwè pàmwàpa ne ncifwànyine kwikala dìbà òvwà dikèngela anu yèyè kwikishakù katanci kakese, ne pàmwàpa ndi mèmè mufwànyine kwakula. Nenku ndi—ndi nKulòmba bwa ùnkwàcìshèku mpindyewu.

⁶⁴ Kùdi mwab’ewu, Mukalenge, aba bàdi neeBe dijinga, pàmwè ne twètù bònsò. Pa nanku tudi tulòmba mpindyewu bwa Wèwè kutùbèneshakù patùdì tubala Dìyi Dyebe ne twelanganapù meeji bwa katanci kakese apa. Nyuma Webè àtùpwekèlèkù, Mukalenge. Ne tùkezùlèku ne tütèkèku pa Kapyà, ne Nyuma Mwîmpè, ne Mukenji wà Nzambi, wùcyùmukilakù ku cyoshelu, bwa kunyùkusha bàà pa buloba bàdi bàpùnga ne lufù aba, kumpàlà kwa diseemena dya Nzambi munene wa Cyendelele. Bwalu tudi tulòmba nùnkù mu Dìna dya Yesu, Mwan’Èndè munanga, ne Musùngidi wetù. Amen.

⁶⁵ Mpindyewu ndi njinga kukòkakù ntèmà yenu ku Mufùndù kampànda kaaba aka, ne tuntu ndambu, tùndì mufùnde etu.

66 Nenku ndi ngeela meeji ne, Doc, anyi Billy, anyi umwe wa kùdibo mmungambìle ne, mbaswe kupàtula bantu kumpàla kwa dîbà ndambù, bwa bânà. Bàdi ne ndambù wa màtâpishì bwa cyôci aci.

67 Nwênù bânà bakese bàdi bàfùma ku dipàtuka mu kàlaasà keenu kàà Dyàlumingu, nù—nùshaalààyikù anu kaaba aka, katanci kakese cyanàànà. Bitùdì twamba kaaba aka bìdi mwa kwikala bya ndòndò ndambù bwenu nwênù, kàdi nwênù—kàdi nwênù sòmbaayi anu bapùwe pàmwè ne maman ne papa, bwa tusunsa tukese cyanàànà. Ndi muswè kwakulakù naabò bôbò.

68 Mpindyewu, mu Misambu, Musambu wà 89, ndi muswè kubalakù mvensà umwe anyi yibidi, ya Musambu wà 89. Nènteetè bwa kubala mvensà wa 50, wa 51, ne wa 52 ya Misambu 89.

69 Mpindyewu, nudikù mwa kuumvwa bîmpè anyi, too ne lwà mundekeelu mwàmwa? Nwênù mwa kuumvwa, elààyikù byanza muulu. Pa nanku ndi. . . Ncyèpi cidi. . . Bikòlokolo byònsò ebi mbyasa ku nzembu anyi? [Muntu kampànda udi wàmba ne: “Ncyèna mumanyè to.”—Muf.] *Eci* nùнку ncidi citàmbe bwîmpè, anyi ng’*eci*? *Eci* anyi? *Eci* anyi? [“Bibidi bìdi ku luseke ebi mbyasa ku nzembu.”] Apa mene, bibidi bìdi ku luseke *ebi* anyi? [“*Eci*, *eci*, ne *eci*.”] Eyo.

70 Ncyèna mumanyè ní bààkwàta cyôci *eci* pa mukàbà wà mēyi anyi to. Cidi anu bu bwalu bùvwà kabùyi bwindila mu dinda emu’s.

71 Kàdi kanùpu mwoyi mpindyewu’s, nwâmbilaayi balundà beenu bònsò. Ne ndi—ndi muswè bwa nwìkalè batwìshìibwe, pàmwè ne bònsò, bwa kuteeta bwa kulwa mu disangisha dya dyàlumingu dyàlwà.

72 Nebàjikijè ekeleeziya lùkàsà mwaba awu, ngeela meeji. Ne nê—nèngiikalè mwalùkile dîbà adi bwa cyôci *eci*, kuyiisha Bitampì Mwandamutekète abi, cyôci ciikàle diswa dya Nzambi, mu Mifùndù emu.

73 Mu Mukàndà wà Misambu, nshapità wa 89, tubanga ne mvensà wa 50. Tèèlejàayi ne ntèmà yònsò kubala kwa Dîyi mpindyewu.

Vùlukàku, Mukalenge, bundù bwa basadidi beebe, mûndì mwambùle munda mwànyì bundù bwa bantu bònsò bàà bukolè;

Bwine bùdì beena lukunà beebe beelè, Éyì MUKALENGE, bwine bùdìbo beelè pa bidyacilu bya makàsà a mwela maanyì webè.

MUKALENGE àbeneshiibwè kashidi. Amen, ne Amen.

74 Ndi muswè ngààkulèku neenu mu katanci kakese pa. . . Ndi muswè nùfundèku cyôci aci, dyàmbedi, ne nucìbalè nùcìbalùlùlè,

bîmpè menemene. Pàmwápa bikèngela kucibalulula mpindyewu mene. Tèèlejàayi ne ntèmà mpindyewu. Nwamònu anyi?

Vùlukàku, Mukalenge, bundù bwa basadidi beebe, mündi mwambùle munda mwànyi bundù bwa bantu bônso bàà bukolè;

Bwine bùdi beena lukunà beebe beelè, Éyì MUKALENGE, bwine bùdìbo beelè pa bidyacilu bya makàsà a mwela maanyi webè.

MUKALENGE àbeneshiibwè kashidi. Amen, ne Amen.

⁷⁵ NùCilongàayi ne ntèmà, mùdi Davidi mucyàmbè amu. Ndi muswe kwangata cyena-bwalu. . . Ncya pabwàci menemene, cyòci aci kabidi bu cyena-bwalu cya Noël; kàdi mmúmvwà muyiishè mu dyàlumingu dishààle pa cyena-bwalu cya pabwàci. Ngápù mwoyi mpindyewu cìvwàci. Cìvwa. . . [Mwanèètù kàmpànda ùdi wàmba ne: “*Buloba Munkaci Mwà Kunyanguka.*”—Muf.] Wamba ne? [“*Buloba Munkaci Mwà Kunyanguka.*”] Dinyanguka: *Buloba Munkaci Mwà Kunyanguka.*

⁷⁶ Mpindyewu ndi muswè kwangata bu cyena-bwalu, edi dyàlumingu ne: *Bundù Bwà Bwalu Bwà Dìyì.* Mpindyewu ncyàmbùlùleku cyàkàbidi, bîmpè menemene. Kùdi. . . *Bundù Bwà Bwalu Bwà Dìyì.*

⁷⁷ Nzambi ùtu ne cikondo, ne kabingilà bwa ciine cikondo aci, bwa kuuja Mèyì Èndè ònsò. Nzambi mmumanyè anu menemene cyènzàYe. Twètù to. Butùdi twètù naabù mbwà kucyàngata pàdiYe ùtùpèèshaci apu. Kàdi, Yèyè mmumanyè, ne kakwènakù ciikalà mwa kupampalamuka mu cidiYe—cidiYe mulongòlòle bwa kwenza to. Byònsò bìdi ne cya kukumbana. Kùdi ne cya kwikala, mîngà misangu, bintu bikàyàbàle ne bishilè, anu bwa kupàtula ngiikàdilù wa cya bushuwa, mulelèlè wa cintu aci.

⁷⁸ Nudi bamanyè's, mvùla ùtu ùlediibwa mu maulu a makenyè ku mènu, masùnsùke, matangalaja kùdi mikenyi, a mikungulu. Ne bu ne katùvwakù ne mvùla to, nunku katwèna ne mwoyi to. Kàdi nudi numòna cidi cìkèngelà bwa kutwàla mvùla anyi? Mikungulu, mikenyi, bukènkè bwa bùpenya, ciiji. Ne kwòkò aku nkùdi mvùla ùfùma.

⁷⁹ Dimiinu didi ne cya kufwà, kubola, kunyanguka, kununka, ne kwalukila ku lupwishi lwà buloba, bwa kumònadi mwa kutwàla mwoyi mupyamùpyà.

⁸⁰ Bidi bikèngela dituucika dya ngòlò, ùkùdimunyiibwa emu ne emu, misangu ne misangu, ne ùtuuciibwa too ne pàdi bisòtà byònsò byùmushiibwamù. Kì mbwalu ùdi ùkenka to, bwalu bunyingunyingu bwa cyamù cifiike, bùdìbo bamanyè ne nngòlò wa muntu mukùtākàne abu, butù bùkenka byenzè bu ngòlò mulelèla. Kàdi, bitèèkè byònsò bibidi abi kaaba kàmwè. . . paùdi ubitèèka eci ku luseke eci ku lwàci luseke,

mbikolè bwa kubìsunguluja, kàdi ùbitèèkè kaaba kàmwè, udi mwa kubìsunguluja. Nenku bikèngela bwa mutuuci misangu yònsò àtuutè too ne pàdiye ùmòna cimfwànyì cyèndè—cyèndè sungasunga cimwèneshiibwa mu ngòlò awu.

⁸¹ Ne Nzambi ùtu ùkòsa cikondo ne ùtu ne kiipàcilà bwa byònsò bitùYe wènza. Kakwèna cintu nansha cimwè cidi cyènzeka anu ku mpùùkàpùùkà bwa aba bàdi banangè Mukalenge ne babiikidiibwe bilondèshile dibiikila Dyèndè to. Nwamònu anyi? Tudi badyànjila kulongolola. Ne byònsò bìdi bikwàcishangana anu mu byòbì, bwa bwalu abu, bwalu Yèyè kèna mwa kushima nansha. Ne Yèyè mmwambè ne ki mùvwàbi ne, cintu cyònsò cidi ne cikondo cyàci, muvù wàci, ne cidi ne mushindu wàci. Ne Nzambi ùdi paanyimà pàà nkwaka ne nkwaka yònsò. Kàdi nudi mîngà misangu nwela meeji ne bintu byònsò biyaaya kabèsà. Abu bùdi anu kutùdi. Bintu abi mbitwèla pambidi, mateeta ne didikonkakonka. Nku diteeta bàtwèla, bwa kumòna mutùdi tubìndulukà ku cyezèdi kampànda.

⁸² Kùkaadi cikondo kampànda, mu Vermont mwàmwa, mèmè ne Mwanèètù Fred tuvwa bayè ku luseke lwà New York, dyàmwàmwà dya Dijiba dya Champlain, kàdi tuvwa bayè lwà ku luseke lwà New York. Ki mèmè kubànda ku mukùna kùvwà, kumutù kwa Hurricane Mountain, kùmvwà ne ciibidilu cya kuya kalemba nyama. Ne kwòkù aku ndi mvùluka pàmvwà mujimìne, ne mùvwà Nzambi mundombòle bwa kwalukila, anu ku Nyuma Mwimpè nkàayèndè, mwine amu mu cipeepèlè cicolè cya mvùla. Bidi ne, nunku ndi mufwè, mubùtuke, ne mukàjàànyì kabidi ne Billy, mu kaacitùùdilu kakese mu ntàntà wa kilòmèètà yàbùngì. Nenku mvwa mujimìje njila.

⁸³ Kàdi kùvwà anu nèjè mukese menemene mutùvwà bapicìle, bwa kuya kabwela mu citùùdilu aci, ku ntwàdijilu wa muvù wà bintu bitùloka aku. Nenku mvwa mwimàne mwaba awu nyiikilangana ne Mwanèètù Fred, ki Nyuma Mwimpè kwamba ne: “Ndà pàà nkààyebebè.” Ki mèmè kubwela mu cisuku bwa katanci kakese, mu mwaba kampànda. Yèyè kungambila ne: “Kùdi butèyi bukwelela. Ùdimukè mpindyewu.” Kàdi Yèyè kààkangambila ne mmunyi, ncinyi to. Mèmè kwalukila ne kwambila Mwanèètù Fred.

⁸⁴ Twètù kuya mu ekeleeziya dilòlò adi mu dibàlaasà amu, kucimanyisha bantu. Kàdi mu dilòlò dyàkalondà kwenzekaci. Ne pashiiishe mèmè mwimàne mwaba awu ki kungambila Yè, bwa baseki kampànda. Kwamba Yè ne: “Bwalu bùdi mu byanza byebe wèwè. Ciwènzà naabò aci. Cyònsò ciwàmbà aci, necyènzekè mpindyewu mene.”

⁸⁵ Ki bwalu abu's. Mwaba awu, muntu kampànda wa mupangè kaneemu, kàyi ùneemeka Nzambi to, ne biikàle beèlulwila ne bàseka disangisha adi, nsongààlùmè ne nsongààkàjì kampànda.

Nenku ùwva ùteeta kwenza nendè mananga a ciipanshì mu citanda amu; cìkòka ntèmà ya bantu bònsò, pàànyì nteeta bwa kuyiisha's. Ùmukòkela mutù paanyimà ne ùmubanda pa bibelu, ne ùmutùma mutù paanyimà ne ùteeta bwa kumutwà mishìku, ne mutùngùnùke mushindu awu mu disangisha amu, ùkòka ntèmà.

⁸⁶ Ki Nyuma Mwîmpè kwamba Yè ne: “Mpindyewu yèyè ùdi. . . Bàdi mu byanza byebe. Newènzè naabò cinyì?”

⁸⁷ Kulwakù cinyàànyà cya cijila. Bantu bònsò bààkashààla bapùwe anu bu bitàlù. Ki mèmè kudyàmbidila ne: “Èyì Nzambi, cìndi ne cya kwenza ki cinyì?”

⁸⁸ Dìbà adi mèmè kuvùluka, bu kabùyi bwa didimwija dya Nyuma Mwîmpè adi, kùkaavwa matùkù abidi. Mèmè kwamba ne: “Ngănùfwìdi luse.” Mpindyewu, aci ki cìvwàYe muswè bwa mèmè kwamba. Nwamònu anyì?

⁸⁹ Bwalu, twamb'eku twamb'eku, mèmè—mèmè's ntukù pàànyì mupùile, pàmwàpa kacìyi ku aci to, kàdi mupùile. “Udi mupùile ku kantu katàmbe bukesè mmupùile ku cyònsò.”

⁹⁰ Pa nanku mèmè kwamba ne: “Ngănùfwìdi luse.” Ne kùdi bantèmù basòmbe kaaba aka mpindyewu, bàvwàpu dìbà adi. Dìbà adi Nyuma Mwîmpè kupòngoloka Yè mwab'awu.

⁹¹ Mpindyewu, nudi numòna's, ndi ngiitabuujà ne bintu byònsò ebi bìvwa ne dyumvwija kampànda. Cyùvwà mufwànyine kwikala mwenzè ncinyì ne bukolè kampànda? Mmuniyì mùvwà mufwànyine kucyènza, wamònu's, dibìnduluka ku cyenzedi? Cintu cidì cilwè bu cyenzedi, kàdi udi wèwè ubìnduluka ku cyenzedi aci bìshi? Nudi numvwà cìndi nswà kwamba aci anyì? Cyùvwàku wèwè mufwànyine kwenza ncinyì? Ne pàmwàpa byònsò ebi mbyenjìibwe bwa kutùfikisha patùkaadi mpindyewu apa's. Ncyèna mumanyè. Ncyèna—ncyèna anu mwa kwamba to. Kàdi kùtu misangu yònsò anu mushindu kampànda . . .

⁹² Kàdi vùlukaàyi ne, bundù bwa—bwa Dìyi budi. . . Dìyi ditu misangu yònsò anu dyambùlambùle bundù. Mu bikondo byònsò, Dìyi dilaaba dya Nzambi ditu misangu yònsò anu dyambùlambùle bundù. Ne ki bwa cinyì mbikolèle menemene bantu bàdi kabàyi bùmvwà, bwa kufwàna kumanya mwa kwitaba bundù abu.

⁹³ Nudikù mwa kuvùluka bayiidi pààkaalukilàbo bènda bàsànka bwalu bààkafika ku dyumvwà ne bàvwa bàbadiibwa bakùmbànyine kutwàla bundù bwa Dìna Dyèndè anyì? Yèyè mmwambè ne: “Bònsò bàdi ne nsòmbelu wa difwàna dya Nzambi mu Kilisto nebàtwalè dikèngeshiibwa,” bundù bwa Dìyi.

⁹⁴ Bikèngela misangu yònsò wikalè anu utwàla bundù ebu bwa wamòna mwa kufila diteeta dyebe, bwa kumòna. Muntu yònsò udi ulwa kùdi Kilisto ùdi dyàmbedi ne cya kwikala mwànà mulongesha, bwa—bwa kiipàcilà kàdi Nzambi

mukulongòlwèle. Kàdi vùlukà ne, bu wèwè anu mwa kushààla mupùwe's! Vùlukà ne, pìikalàbi ne Yèyè ngudi mukubiikile bwa cyòci eci, kakwènakù cìdi mwa kupangisha bwa kwenzekaci to. Kakwènakù démons búngì bukùmbàne mu mwaba wà dikèngeshiibwa to, amu Dîyi dya Nzambi ndyàmwèneshiibwà. Udi mulela mu kiipàcilà, ne muntu kènàku mwa kwangata kaaba keebe nansha. Udi mufwànyine kupeta bakutentudi ne bikwabo byònsò, kàdi kabàakwangatakù kaaba keebe to. Cya bushuwa. Dîyi dya Nzambi ndyàcimunà. Kadyèna mwa kupangilakù to. Ki pàvwàbi bikèngela bwa mwena Kilisto yònsò kwikalayè mwimànyine, mumanyè aci—aci. Kàdi mateeta neàjuukè, ne miikàle ne mmwènekèlu ya mishindu yònsò, kùdi. Kàdi vùlukà ne, Nzambi ùdi ne kiipàcilà, ne byònsò abi nebikwatè mudimu anu mu byòbi.

⁹⁵ Mpindyewu twánjàayi kuvùlwija àmwè a—a ku maalù a mùdi Dîyi dya Nzambi adi dyùle, ne aba bàakambulà Dîyi mu cikondo cyàbò.

⁹⁶ Ndi—ndi muumvwè mu Nyuma, kì nkwanji kwenza ntàntà mule to ne, muntu kampàndà ùvwa ùnjaana. Ncifwànyine kwikala mu mwaba wùdibo bàtèeleja mikàbà ya mèyi. Bwà mùntù misangu yònsò anu ntàmba kutèela, ngaalukila cyànyimà nkangata bantu bàà mu Bible pa bindi ngamba. Ee, ntu ncyènza mmu kiipàcilà. Bible mmwambè ne bintu ebi byàkafùndiibwa bwa twamòna mwa kutàpakù dîsù. Ne ki mushindu wùmwèpelè, mùndi nciyi ne tulaasà tulonga, mushindu wùmwèpelè wùndiku mwa kwenza, nkwalukila paanyimà ne kwamba ne: “Nudi numòna mwaba wùdi *cikampàndà* cìsanganyiibwa ewu, cìdi cicyènzèkèle, mwaba wùdi *cikansanga* cyènzèkèle.” Nwamònu anyi? Ne pashiishe uditèeka wèwè mwine mwaba awu.

⁹⁷ Mùmvwà nyiisha, anu abidi àdi panshi aa, pa mwànà mukese wa balùme mu màzuwà a mayi, nudi bamanyè's, ne—ne kàpìteenà mukolè awu ùvwa ùpunga ne lufù. Ùvwa ùsaama. Ki kukonkayè ní kakùvwakù Bible mu màzuwà amu. Ki kupetabò mwànà mukese wa balùme uvwa ne Bible awu, ki kulwayè kubala Yeshàayi 53.5. “Wàkatàpiibwa mpùtà bwa dishipa dyetu dya mikenji, muzaajiibwe bwa bubì bwetu.” Ki kwabayè ne: “Ngánji. . . Ngánji nkwambilèku, kàpìteenà, mùvwà wanyì mààmù ne ciibidilu cya kucibala.” Yèyè ne: “Mòna mwàkacifùndàye yèyè: ‘Wàkatàpiibwa mpùtà bwa dishipa dya mikenji dya Willy Pruitt. Ne Wàkanyookiibwa bwa Willy Pruitt. Ne bintu byònsò byàkenzàYe ebi, bìvwa mbwà Willy Pruitt.’” Ki cìvwà dìnà dyèndè.

Kàpìteenà mukolè awu kwabayè ne: “Ndi munangè aci. Udikù mwa kubadilamù dìnà dyànyì anyi?”

⁹⁸ Yèyè ne: “Ngánji nteetè.” Ki yèyè ne: “Wàkatàpiibwa mpùtà bwa dishipa dya mikenji dya John Quartz. Wàkazaajiibwa bwa

bubì bwa John Quartz. Ne ku mibùndàbùndà Yèndè John Quartz wàkondopiibwa.”

Yèyè ne: “Ngùmù.” Ki Mukalenge kumwondopaYè. Nwamònu anyi?

⁹⁹ Badilàmu dîna dyebe. Wàkatàpiibwa mpùtà bwa dishipa dya mikenji dya William Branham. Wàkazaajiibwa bwa bubì bwa William Branham. Wàkenza aci bwànyì mèmè, ne Wàkenza aci bwebe wèwè. Badilàmu dîna dyebe.

¹⁰⁰ Ee, ki mûntù mèmè muswè kutwàdila cisàmbà cyànyì—cyànyì Mifùndu, ncìvwàYe mwenzèle muntu mukwabo kampànda wàkaMutùmikila awu. CyàkenzelàYe muntu mukwabo kampànda uvwa ne lulamatu ku Bwalu abu awu, ne cyàkenzelàYe muntu kampànda mukwabo uvwa kàyi ne lulamatu ku Bwalu abu, dîba adi wèwè ubalamu dyebe dîna. Bu wèwèpù, mmwaba kaayì wùvwàku mufwànyìne kwikala mwangàte? Ne vùlukà ne, wèwè udi ne dyèsè, leelu ewu, dya kwangata mwaba wa mushindu wumwewumwe awu.

¹⁰¹ Cíkondo aci, Noà, pa bundù bwa Dìyì divwà Nzambi mumwambile. Noà, kùvwa bundù kampànda. Noà ùvwa ne mwoyi mu cíkondo cya maalu a mamanya, mùvwà byenzedi bya bulòbò bya maalu a mamanya bìvwàbo mwa kukwatakaja, bìvwà bitàmbe kule ne kule cintu kanà cyònsò citùdì twètù bakwàtàkàje leelu ewu. Bòbò bàvwa ne meeji matwè, matàmbe kwikala matwè. Àbò maalu a mamanya àvwa matàmbe ètù twètù, kule ne kule. Nenku vùlukàayi anu ne, byàkakèngela bwa kutwàlayè bundù bwa Dìyì dyàkayiishàye adi, munda mwa bidimu lukàmà ne makumi abidi, kumpàlà kwa baseki. Mishindu yabo minene ya maalu a mamanya yìvwa yìbàaadikila ne kakùvwakù mvùla mu maulu to. Kàdi, nansha nanku, Noà ùvwa mutèlèlèje Dìyì dya Mukalenge, ne Dyòdi divwa dibèngangana ne wabò mmwènu waCì. Pa nanku, kumpàlà kwa wèndè mwoyi kusùngidiibwawù, byàkakèngela bwa kwimanayè kumpàlà kwa baseki abu ne kutwàla bundù bìvwàbo bamwelè pambidi abu.

¹⁰² Kaa, kakùyi mpatà to, bàvwa ne cya kwikala bumvwile mukwàcìkwètù muyiishi mukùlùkàji awu luse. Kabààkamwelesha mu cikùnyì anyi cintu kampànda to, bwalu pàmwàpa kakùvwa nzùbù yàbùngì ya mushindu awu mu diine ditùku adi to. Yèyè kàvwa njiwù bwa bantu to. Kàvwa mwa kwenzela muntu nansha umwe bibi to, ki kumulekelabò nanku awu. “Tùngunukà’s, wèwè mukoleshi wa maalu wa kale udi ku luseke lwà kakùnà aku awu, munkacì mwa kwibaka bwàtù kule mwab’ewu wùdì kawùyi màyi ewu. Kaa, ee, wèwè mukùlumpè mukwàte ne bya luse ewu! Kàdi,” mùvwàbo bàmba, “kuwàpetelà miine màyi èbè awu ki kwèpi, bwa kulèlemija bwine bwàtù bwebe abu, Noà?”

“Àdi àfùmina mu maulu.”

103 “Macimbu’s. Twètù’s tudi mwa kutùma byamù ku ngondo ne ku mitooto, ne tulòndò twa mpolondo,” cyònsò cìvwàbo naaci aci. “Kakwènakù mvùla muulu mwàmwa to.”

Kàdi yèyè wàkamba ne: “Nzambi’s mmwambè ne Yèyè ùvwa mwa kumutèekamù.”

“Neàcyènzè bishi ciine aci?”

104 “Aci nciMutàngile Yèyè. Cintu cìmwèpelè cìndi mémè ne cya kwenza nkunùdimwija bwa nùumukè mwab’ewu.”

105 S’bidi byàmba kwikala anu bya mwomùmwe leelu ewu. “Kapyà kàdi kàfùmina penyi?” Mwanèètù, s’mbitòòkekù leelu ewu kutàmba bya cikondo cya Noà. S’tukaàdi bamòne mwaba wùdiku’s. Kàkaadi anu pabwìpì ne kuteema, s’kwàjiki. Maalu a mamanya àkaadi. . .Kakwènakù kabingilà to bwa ewu musangu, nansha kàmwe, bwalu maalu a mamanya àkaadi mamanè kukàpeta. Eyowa’s, mukalenge.

106 Pa nanku mpindyewu tudi tusangana ne cìvwa mbwalu anu bwetu ebu. Nanku bóbò bàakuumvwila mukwàcikwètu muyiishi mukùlàkàji awu luse, ki kumulekelabò wènza. Cìvwa ncintu cya pabwàci, pàmwàpa, bwa bantu abu, bwa kwela meeji ne muntu mumanya ne ngwa meeji, kàdi mufwànyine kwitabuuja ne Nzambi, Mufùki wa maulu ne buloba ewu, mmufwànyine kwenza cintu kampànda, anyi kwamba cintu kampànda cìvwàYe mwa kwenza, cìvwa cibènganganà ne wàbò mushindu wà kwela meeji, cìvwàbo bóbò naaci aci. Pàmwàpa kanwèna bacyùmwe to. Tàngilàayi. Cìvwa. . .Bàvwa bèèla meeji ne bàvwa mwa kujaadikilangana cintu cyònsò cya mu bufùki ku maalu àbò a mamanya awu. Aci cyòci kacyi buloba bumwebumwe butùdi twètù basòmbèle leelu ewu ebu to, bwa mamanya a mu mitù, bwa malongeshanganyi bùle tètè ne maalu a mamanya ebu! Ne cyònsò cìvwàbo bafwànyine kujaadikilangana aci, cìvwa cya mafi, cya Nzambi. . . “Nzambi kènàku mwa kwamba cintu (cìvwa) cìfwànyine kwikala cijaadikiibwe ku maalu a mamanya ne kacyènakù to.”

107 Mpindyewu, bàdi ne mmwènenu umwèumwè awu leelu ewu. Docteur webè yèyè wàmba mùdi ne disaamà dya kànsèrè, ne bùdi naabù mbwà kufwà, ne maalu a mamanya àjaadika mùdi ne kànsèrè, ne mùkaadiku mu cipidi cibàndile, ne ndikùtakana bwa kwela meeji mashiilàngàne kanà ònsò, bwalu ufwàfwa; kwàjiki. Maalu a mamanya àmba ne neùfwe. Mbakwenzè mateeta, ne ki cyònsò cìdiku. Ufwàfwa. Ne bóbò bàdi bèèla meeji ne ndipaala wèwè uteeta kwamba ne Nzambi mmulayè bwa kucyènza. Nwamònu’s, anu mwàkadibi amu, bùdi naabù mbwà kutwàla bundù abu.

108 Bàmba ne, ngàngàbukà yèyè wàmba apa ne: “Tudi bakenkète byònsò, ne kànsèrè nkayè bikolè. Tudi bakupandè difù. Nkatàngalàke mu mubidi wèbè mujimà, ne mu mwoyi

wèbè mujimà, mu bisùlùsùlù byebe byònsò, mu mucimà wèbè mujimà, myaba yònsò. Kakwèna mushindu to.”

Pa nanku, udi umòna’s, paùdi wamba ne: “Kàdi yéyè neikalè ne mwoyi, nansha bishi.”

Bòbò bàdi bamba ne: “Ee, mulùmè neebe, mulekèlaayi.”

¹⁰⁹ Ndi mvùluka dilòòlò adi. Bill Hall, Mwanèètù Hall ku ekeleeziya wa Milltown kwàka, bààbúngì bàà kunùdi mbavùlùke bwalu abu. Nanku pàvwàye. . . Bòbò kumbùikidisha kuntwaku. Mémè, mukàjàànyì ne màmwènàànyì, twétù kukùya. Yéyè ùvwa musèle mwànà wa bakàjì uvwa, ngeela meeji, mwanààbò ne George Cupp, uvwa mulombodi wa cimenga, anyì nzujì muneemu emu awu. Wendè. . . Awu ùvwa bukwendè bwèndè mulùme. Kulwabò nendè muneemu bwa kufwàye. Ngàngàbukà wa mu Milltown, ngàngàbukà wa mu New Albany, bàvwa bajandùle disaamà dyèndè ne cívwa nkànsèrè kàà ku mucima. Ki mémè kuya kamòna Màndamù Hall. Ne yéyè ùkaavwa mupeté disaamà dya mèsù a kàlaabi, ne ùkaavwa mubidi mujimà anu wà kàlaabi. Ki mémè kwamba ne: “Ee, ndi ncinka ne neáfwe’s.” Kàdi mémè kwamba. . .

¹¹⁰ Mukàjèndè kwambayè ne: “Mwanèètù Bill, kùdikù mushindù wà. . . Udikù mwa kupeta diyì dya kùdi Nzambi anyì?”

Mémè ne: “Ncyèna—ncyèna mumanyè to, Mwanèètù wa bakàjì Hall. Ndi mwa kusambila.

¹¹¹ Mémè kusambila. Ki mémè kwalukila kumbèlu, kàdi Mukalenge kàyikù mungambile kantu nansha kàmwè to. Pashiishe mémè kwalukila, pàakacyàbu, nenku mémè kusambila cyàkàbidi.

Ki kwambayè ne: “Udikù mumanyè ngàngàbukà wa mwìmpè anyì?”

¹¹² Mémè ne: “Ee, ngàngàbukà wa dyetu díkù n’Docteur Sam Adair, muneemu mu Jeffersonville. Yéyè ùtu—ùtu—ùtu. . . Tatwèndè ùvwa ngàngàbukà wa dyetu díkù. Mémè ne Sam mwànà tutu misangu yònsò anu balundà bàà pa mwoyi, ne—ne twákaya mu kàlaasa cikondo cimwè, bakolèle pàmwè. Tutu misangu yònsò anu tuya kùdiye yéyè pàdi bwalu kanà bwònsò kabùyì bwènda bìmpè.”

Yéyè ne: “Ndi ndìkonka yéyè awu ní ùdikù mwa kulwa kutàngila Bill Hall’s?” bàyèndè awu.

Mémè ne: “Nèmmukonkè.”

¹¹³ Ee, Sam kungambilayè, ne: “Billy, piikalàbi ngàngàbukà mwambè ne yéyè ùdi ne kànsèrè,” yéyè ne, “kùdi cintu anu cimwèpelè, cìndì mémè mwa kwenza, nèmmutùmè kùdi muntu udi mumpitè ku meeji, kùdi ngàngàbukà mupilùke. Nanku netùkwatè fòtò ya ku cyamù cya midimà; nanku katwàkumutàcisha kabidi to.”

114 Twètù kutùma muntu ku New Albany bwa kupeta fôtô ya ku cyamù cya midimà ya kùdì ngàngàbukà wa kuntwaku. Twètù kuya nendè ku Louisville ne kumukenketabò, kumwambulabò mu màshinyi a cyambula-babèèdì ne kwalukilabò nendè.

115 Ee, mu bushuwa bwa bwalu, kàvwa muswè kwambila Måndamù Hall lutàtù lùvwà naalù bàyendè to, pa nanku kumbiikilayè mèmè. Yèyè ne: “Neàfwe,” yèyè ne, “muyiishi neebe awu.” Yèyè ne: “Ngàngàbukà mupilùke wa mu Louisville wáfumu ku dimbiikila, wàmba ne: ‘Dijandula dya disaamà didì bangàngàbukà bafìle mu—mu...mu Milltown mwàmwa; ne ngàngàbukà, wa mu New Albany; mbafile dijandula dya disaamà dijaalame.’” Ki yèyè ne: “Nkànsèrè kàà ku mucima, ne kàkaadi kayè bikolè. Nenku, Billy, katwèna mwa kukòsa mucimà wà muntu ewu kuwùmusha, ne yèyè kushààla ne mwoyi to.” Yèyè ne: “Neàfwe. Ne piikalàye muyiishi, bivwa bikèngela ikalè mudilongòlòle.”

116 Mèmè kwamba ne: “Bwalu kabwèna aku to. Kàdì yèyè kèna ne bidimu bipite pa makumi ataanu ne bitaanu to, pa nanku yèyè’s ùcidi anu ne mwoyi mukùmbàne munda mwèndè, bwa kuyiishayè.” Ki mèmè ne: “Ee, byòbì ne ùfwafwa, aci’s ncikòse bwalu. Twasàkidila, Ngàngàbukà Sam.”

117 Ki mèmè kuya ne kubiikidila Måndamù Hall pambèlu, mèmè kumwambila. Mèmè kwamba ne: “Måndamù Hall, Sam wàmbi ne dijandula dya disaamà dya ku Louisville divwa dya mwomùmwe ne dya ku New Albany ne dya ku Milltown. Muntu awu nyewu ùpunga ne lufù. Mwanèètù Hall ùfwafwa. Ne yèyè ùdì ne kànsèrè mu mucima, ne kàkaadi kayè bikolè.”

118 Nenku ki kukùtulayè mwadi. Mèmè kukùdimuka, kusambila pàmwè ne bàyendè. Kàdì yèyè bàyendè awu ùkaavwa mupàtùke mu yèyè, dibà adi, mu mushindu wà ne kàyi ùmanya ne mvwa mu cibambalu amu to.

119 Nenku, mèmè kwalukila. Bantu bùngì cyanàànà bàvwa balwè kwànyì kumbèlu, mu miine matùkù awu. Kakùvwa muntu mukwabo nansha umwe mu budimi bwa bwambi to. Kabùvwa butàmbe kupeta bwenzeji bubì to, ne bantu bàvwa bàfùmina ku myaba yònsò.

120 Mvwa muswè kwikishakù ndambù. Nenku mèmè kwongoloka, kubiika pa bwebwebwe, bu pa dibà ibidi ne tusunsa makumi asatu nanku, anyì dibà isatu wa bufùku. Mwanèètù Wood kàvwa mwanji kufika mu kajila amu to. Dya ntàngila pambèlu mu kajila kàà kumbèlu, kamùvwa muntu to, muntu nansha umwe, nenku mèmè kwangata cifulu cyànyì cya kale e kudifinda mu cibambalu cya ciikishilu amu, ne kwangata cingoma cyànyì cya .22 aci. Nenku nkààvwa nya ku dilemba dya nshìndì, too ne patwàkafikà lwà pa dibà mwandamukùlu, ne pashiishe kudyùpwila kwìnshi kwa mucu mwaba kampànda ne

kupetakù ndambù wa kalù. Kakùvwa mushindu wà kupeta kalù kumbèlu to.

¹²¹ Mémè kwangata cifulu cyànyì e kubwela mu cibambalu amu. Ku cimanu kùvwa kulembeleja cimuma cya pomme. Kàdi ùvwa m'pomme wa—wa mutàmbe kutàpila twìshi wa dikèma. Ùvwa mudyà kùdì biinyà, ne ùvwa ne myaba mishilè, ne ùvwa ne cizubu cyúme pambidi pajimà. Ki mémè kudyàmbidila ne: “Cidì Meda mulembèlèjile ciine cyàcya ku cimanu ncinyi?”

¹²² Ki mémè kumòna, kabidi ne, kàvwa ku cimanu to. Ùvwa mulembèlèle mu lupeepèlè. Mémè kukòpola cifulu cyànyì cya kale aci, kweyeka cingoma mu ditumba, ne kudyùpwila ku binù. Mémè kwamba ne: “Mukalenge, cyŪdì muswè bwa musadidi Webè àmanyè ncinyi?”

¹²³ Kupwekakù mukwabo pomme, kupwekakù mukwabo, too ne mwàkakùmbanàyi pommès yinaayi anyì yitaanu (Ngápù mwoyi mpindyewu búngì bùvwayi) milembèlèle mwaba awu. Pashiishe pomme munene menemene, mulenga, ne tushoonyitushoonyi munda amu, anu pomme munene bikolè, ùmwèka ne mubidi mwímpè, kupwekayè ne kubùlukutayè ya mmwènekèlu wa bidy'á bibolè ayi. Ki kwambaYè ne: “Juuka. Imànyìnà kuulu.” Yèyè ne: “Ndààku, wàmbilè Bill Hall ne, kàakufwà to. Neikalè ne mwoyi.”

¹²⁴ Kaa, mémè kuvùkuta lubilu ne mwànyì mwònsò, ne kwamba ne: “Màdamù Hall, ndi ne EMU MMŪDÌ MUKALENGE WÀMBA. Neikalè ne mwoyi.” Ne bàyèndè ùvwa muntèlèje. Nenku ùvwa ùteeta bwa kudila, kadi kaciyikù mwa kwakula kabidi to.

¹²⁵ Mémè kwalukila ne kubìkila Sam. Ki mémè ne: “Sam, mwa—mwanètètù awu neikalè ne mwoyi.”

Yèyè ne: “Ūdi mwa kwikala ne mwoyi munyì mushindu wùdìye awu?”

¹²⁶ Mémè ne: “Kì mbwalu bwànyì mémè bwa kuumvwa to. Nzambi ngudi mwambè nanku. Aci ncikòse bwalu.”

¹²⁷ Yèyè's ùdi ne mwoyi leelu ewu. Kùkaadi bidimu bitwè ku dikumi. Mmukole booboobo ne mubidi tumatuma. Mukàjèndè kulwa kufwa pashiishe. Ūkaadi musèle mukwabo mukàji.

¹²⁸ Nebyènzekè munyì bwa George Wright, ne bakwabo bààbùngì batùdì bafwànyine kwamba, batùdì bafwànyine kutèela abu? Ncinyi aci? Ki kutwàlà kwa bundù nkwòkò aku. Bòbò bàdi bàseka ne bèèlulwila.

¹²⁹ Ndi mvùluka kumpàlà kwa dipaasalala dya màyi dya mu cidimu cya 1937. Mvwa mwimàne kuntu kwàka pàmwè ne beena Kùmpànyì wa Falls City Transfer, ne mwikàle mbàmbila ne, kùvwa ne cya kwikala màyi àfika ne mu mètres ipacila ku dikumi, ngeela meeji ne bìvwa nanku, mu mùsèèsù wà Spring Street. Kunsekabò. Kwambabò ne: “Mukwàcìkwètù Billy.

Ngeela meeji ne yéyè. . . Mwánà awu!” Ncìcivwa anu mwánà mwine musangu awu’s. Yéyè ne: “Billy ùtu mwánà mwímpè. Bìdì bundù mùdiye mu cibwejàkàjì nanku.” Ncìcivwa mu cibwejàkàjì to. Mvwa mubàtìijùbwe *mu*, ncìyi mu cibwejàkàjì to. Mvwa anu “munda” mwa cintu. Ki kwenzekabi anu mushindu awu.

¹³⁰ Kacya anu mbanga kwakula, ndi mumòne Mwanèètù wa bakàjì Hattie Wright, ngeela meeji, musòmbe paanyimà pààpa. Yéyè mmuvùlùke bwalu bwa Bill Hall abu. Bààbùngì. Mbanganyi bàdì kaaba aka, bàdìpu mu dinda emu, bàdì bavùlùke bwalu abu? Kaa, ekèlekèle! Bushuwa’s. Kùdi bààbùngì bàà kunùdi.

¹³¹ Mpindyewu, bôbò bàdì bàtùmvwila luse, bùmvwila luse ewu yònsò udi uteeta kushàala mukwàte ku Díyi, mu matùkù a baseki. Kàdi, nwavùlukaayi ne, bundù bùdi ne cya kulwa. Bitu anu mushindu awu misangu yònsò. Bàdì ne cya kwikala beelè meeji, mwàkeelàbo musangu awu ne, Nzambi, paanyimà pàà cintu kanà cyònsò cimanè kujaadikiibwa mu maalù a mamanya, Nzambi kàvwakù mufwànyine kwamba cintu cibèngangana ne maalù a mamanya to. Ee, cyôci aci’s ki cìdì cyènza ne Yéyè ikalè Nzambi. Bu ne Yéyè wàkaya anu bilondèshile maalù a mamanya, nùnkù kakùvwa kabìdì cìngà cintu to anu ciwà muntu mwa kukùmbaja aci. Kàdi, Yéyè ùdi Nzambi. Yéyè’s ki—Yéyè’s ki Mufùki wa maalù a mamanya. Yéyè ùdi mwa kwenza cìdìYe ùjinga kwenza aci.

¹³² Bàvwa ne cya kwikala badyãmbidìle ne: “Mulùme neebe Noà, ee, lekèlaayi mukùlumpè awu ku macì tálàlà. Yéyè kèna ne milòwù yònsò yitùdì twètù naayi mu matùkù aa eyi to, nanku mulekèlaayi anu ku macì tálàlà.” Bìdì byàmba kwikala bya mwomùmwè mpindyewu.

¹³³ Kàdi, mpindyewu, ndi muswè kwamba cikwabo cintu mwab’ewu mene. Mpindyewu, twètù tudì tutàngila paanyimà twanyisha diitabuujà dyèndè. Kàdi ndi mèmè ndikonka ne, bu ne tuvwa ne mwoyi mu diine ditùku adi, tuvwakù bafwànyine kwikala bangàte kaaba kàvwà Noà mwangàte aku anyi? Tuvwàkù bafwànyine kwikala bakùmbàne ne baswè kutwàla bundù bwàkendà pàmwè ne Bulelèlà abu anyi? Pàvwàbì ne, ku miliyò yònsò yìvwà pa buloba musangu awu ayi, kùvwa anu Noà ne dìkù dyèndè bààkatwà Bulelèlà abu nyama ku mikòlò. Nuvwakù bakwèlèle meeji anyi? Anu muntu awu ne bàna bèndè bàà balùme basatu, ne bakàjì bàà bàna bèndè, ne mukajèndè, ki bôbò abu nkàyaabò bààkatwà Bulelèlà abu nyama ku mikòlò. Kàdi bôbò mbàvwà ne EMU MMÙDÌ MUKALENGE WÀMBA. Tudì twètù tutàngila paanyimà tumwanyisha. Tudìkù bafwànyine kucyèlela meeji cyàkàbìdì anyi?

Bikèngela ndwijakajè bwa bwalu bwa màtàpishì a bàna aa.

¹³⁴ Abraham, mwakù mene *Abraham* wùdi wùmvwija ne “taatù wa matùngà àbùngì,” cimuvvwija “taatù wa matùngà.”

¹³⁵ Mpindyewu, Abranham wàkumvwa Dìyì dya Nzambi. Abraham ùvwa muprófeta, ne wàkumvwa Dìyì dya Nzambi. Kàdi twètù tudi twanyisha Abraham bwa dilamata dyèndè dya ku Dìyì dya Nzambi; mwàkatàpulukàye ne bilongo byèndè; mwàkadìbi bwalu bukolè bwa Abraham's. Mwómò amu mmùvwàye mukolèle. Bafùmìne ku Baabèlè, ne—ne bàsanganyibwa mu buloba bwa Shinèa ne beena—beena—beena Kasàdà, mu cimenga cya Ulà amu, mùvwà beena dyèndè bònsò, bàà kwabo, ne aba bàvwàbo bàya naabò mu ekeleeziya, ne bikwabo byònsò. Kàdi Nzambi wàkamba ne: “Tàpulukà.” Kaa, ekèlekèle! Cintu kaayi cya cyènza bwòwa's wè, bwa kushiyangana ne bònsò bàvwàye munangè, byònsò bivwà bilelèlè kùdiye, bivwàye munangè abi. Kàdi Nzambi wàkamwambila ne: “Tàpulukà.”

¹³⁶ Ne kumupèèsha cintu cya pabwàci menemene. “Neùpetelè mwànà ku mukàjèèbè awu.” Pèndè's ùkaavwa ne bidimu makumi mwandamutekètè ne bitaanu, ne mukàji ne makumi asambombo ne bitaanu. Bikaavwa bijikè bwa kwikalayè mùdi bakàji, mùvwà bakàji bàvwa mwa kulela bànà amu, kùkaavwa bidimu. Nenku apa, paanyima pàà mumanè kusòmba ne mukàji awu kacya pacìvwàye nsongàakàji, bwalu ùvwa mwanàabò wa bakàji mukwàtatwèndè, kàdi díbà adi mmunyi mùvwàyekù mwa kulela mwine mwànà awu? Nenku mpindyewu nudikù mwa kudifwànyikijila Abraham ùpàtuka munkaci mwa beena dyèndè amu, wàmba ne: “Netùpetè mwànà, mèmè ne Sarah” anyi? Nudikù mwa kudifwànyikijila aci anyi?

¹³⁷ Mòna's, bantu bàakamba ne: “Mukwàcikwètù, s'kùdi cintu cipampàlàmmùke mu yèyè.”

¹³⁸ S'mbundù's, kàdi Abraham wàkashààla mukwàtekù. Nenku pàakakumbajàye bidimu lukàmà, kàakatènkakanakù ku mulayi wà Nzambi nansha. Ùvwa anu kacya wàtwàla bundù abu, cya bushuwa, kacya anu wàkwàtakù.

¹³⁹ Nudi numònakù dishiilangana didimu adi anyi? Sarah kuteetayè bwa kupèèsha Abraham, to, anyi kupèèsha Nzambi's wè, ndambù wa dyambulwisha, dya mu yèyè. Wàkeela meeji, nudi bamanyè's, cyòci aci, bishiilàngàne ne cìvwà Nzambi mulayè aci. “Mpindyewu, udi mumanyè's, mèmè ndi mukàji mununu, kàdi Hagàà ewu's mmukàji mulenga kwìsù. Kabyàkutàcisha Abraham bwa kumusèlayè pèndè to. Pa nanku, udi mumanyè's, aci's—aci's necikwacishèku Nzambi. Aci necikwacishèku Nzambi, bwalu, Hagàà ewu, pàmwàpa ùcidi anu ne bidimu makumi abidi. Yèyè's mmwena mudimu wanyi mèmè. Nenku udi mumanyè cingenzà anyi? Nèmmufilè kùdi bàyaanyi, bu mukajèndè,” bwalu dibàkà dya ne bakàji bààbùngì divwa dikumbànàngàne ne mikenji. Ki kwambayè ne . . . “Nèmmufilè, ne yèyè neàlèlè mwànà ne bàyaanyi, ne díbà adi mèmè nèngàngatè mwànà awu. Nenku ki yèyè awu, udi Nzambi mulayè.”

140 Nudi numòna's, twètù tutu misangu yònsò anu tuteeta bwa kwenzakù cintu kampànda; katuyikù mwa kuMwindila Yèyè to. Bikèngela twènzè cintu kampànda, mu twètù. Bivwa bifwànyine kwikala anu bimpè. Ùvwa mufwànyine kwikala mulenga kwisù. Bivwa bifwànyine kwikala bimpè be, kàdi kacivwa bilondeshile Dîyi nansha. Nzambi ùvwa mwambile Abraham ne mwànà awu ùvwa ùvwila ku Sarah.

141 Nudi bavùlùke cyàkambaYe bwa Kasumbù kakese kàà mikooko anyi? “Bimanyimu ebi nebifilè aba bàdi bìitabuujà.” “Anu mwàkadibi mu matùkù a Noà, ki mwikalàbi kabidi ku dilwa dya Mwànà wa muntu, pàvwa bakese menemene, misùukà mwandamukulù, misungidiibwe.” Mèyi awu kaèna mwa kupangilakù to, nenku tùditàngilaayi twètù biine ne ntèmà ne tùshaalàayi ne Dîyi. Eyo. Nwamònu anyi?

142 Bantu bàtu bôbò misangu yònsò anu bàteeta bwa kukwàtakaja cintu kampànda, bwa kwangataci kaaba kàà diswa difùki dya Nzambi. Nudi numòna's, anu múnkaadi mwambàmbe, ne pàmwàpa kumpàlà kwa ekeleeziya, kumpàla, nudi bamanyè's, kwènàku mufwànyine kulòmba mukooko ne: “Udi mwa kunkwàtakajilakù myòsà ya mukooko anyi?” To, kawèna mwa kwenzakù aci to. Mpindyewu, mbuji kèna mwa kukwàtakaja myòsà ayi to, bwalu ngiikàdilù wendè kèna mwa kumulekela wücyènza to. Nansha wèwè uteeta munyi bwa kuswikila myòsà ya mukooko pa mbùji, kabyàkukùmbanakù to. Mbùji kèna mwa kukwàtakajakù myòsà ya mukooko to, anyi mukooko kawèna wùkwàtakaja nsuki to. Kàdi wòwò wùdi ne myòsà ayi bwalu mmukooko. Ki cidì ciwènza wòwò. Kawèna wùyikwàtakaja to.

143 Katwèna ne cya kukwàtakaja mamuma a Nyuma to. Butùdi naabù mbwà kukwàma mamuma a Nyuma. Muci wà pomes kawèna wùkwàtakaja pomes nansha; wùdi wòwò anu wùyikwàma bwalu mmuci wà pomes.

144 Nenku patùdi tuteeta bwa kukwàtakaja nì ncinyi nì ncinyi cyònsò ne: “Mémè nènkwacishèku Bwalu abu. Nèndongè munda mwa bidimu dikumi mu sèminèrè. Nènyiilè *bikampànda*, *bikansanga*, anyi *bikankènga*, bwa mpetè dipòlomè dyànyi dya Licence ne dya Docteur. Nènkwacishè Mukalenge, nkààyaanyi.” Kabyàkukùmbana nansha.

145 Nzambi, ku didyànjlila-kulongolola, ùdi ùbiikila udiYè Yèyè muswè awu. Ùdi ùfila Bukalenge kùdi udiYè Yèyè ùjinga kuBùpèèsha awu. Tudi bayiilè aci mu bwalu bwa Nebùkandànéèsà.

146 Tudi bayiilè aci mu bwalu bwa—bwa Yelèmiyà, pààkamwambilà Nzambi aci, ku Dîyi dya Mukalenge, ne, kùvwa kùlwa cikondo cìvwa Izaleela ne cya kuyabo nendè mu Baabùlònà munda mwa bidimu makumi mwandamutekète. Ki mukwabo muprofètà udi ujuuka ewu. Yèyè ùkaavwa mumanè

kumwambila, wàmba ne: “Mpindyewu, neùpetè bapròfetà, biikalà mwa kujuuka. Ne newikalè naabò mu Baabùlònà mwàmwa, biikalà mwa kujuuka, ne balòòci bàà bilòòtà ne bapròfetà, biikalà mwa kwamba bipròfetà bibèngangana ne Eci. Kàdi ambilà bantu bwa kabàtèèlejìkù bantu abu to.”

¹⁴⁷ Nenku ki kujuukakù muntu ne dìnà dya—dya, umwe wa ku bapròfetà, Hanàniyà. Nenku pàvwà Yelèmiyà mwimàne mwaba awu ne cikòkedi pa nshìngù, ki kulwakù Hanàniyà, wàmba ne: “EMU MMÛDÌ MUKALENGE WÀMBA, mu bidimu bibidi bulubulu, mabùngù ònsò a Mukalenge. . .” Mpindyewu, bilòndèshìle mùvwàbi bifùnda, cìvwa cimwèka cìmpè. “Nzambi neàbeneshè cisàmbà Cyèndè. Neààlujè bintu byònsò anu mu byòbì, munda mwa bidimu bibidi.”

¹⁴⁸ Ne Bible mmwambè ne, nansha mupròfetà Yelèmiyà mwine wàkamba ne: “Amen. Amen. Hanàniyà, Mukalenge ènzèku ne mèyi èbè awu ùlè. Kàdi twànjìku kuvùluka cintu kampànda, Hanàniyà. Kùkaavwakù bapròfetà kumpàlà kwetu twètù aba, ne bòbò bàakamba bipròfetà bilwisha matungà manene bya mvità, ne bikwabo byònsò. Kàdi, wavùluka ne, mupròfetà ùtu ùmanyika paanyimà pàà cipròfetà cyèndè cimanè kumwèneshiibwa.” Nwamònu anyi?

¹⁴⁹ Dìbà adi Hanàniyà kulwayè, kukwàtayè cikòkedi cìvwa pa nshìngù pàà Yelèmiyà aci e kucyùmushayè, kumpàlà kwa baakwidi bònsò ne disangisha bitùùle, pàmwàpa bantu mùliyò mujimà ne citùpà. Ki kwangatayè cikòkedi cìvwa Nzambi mutèèke pa nshìngù pàà Yelèmiyà aci, bu cimanyinu, kucicibululayè tutùpà tutùpà, ne kucyèlayè ku makàsà èndè yèyè, mwikàle anu musalùke, ne kwambayè ne: “EMU MMÛDÌ MUKALENGE WÀMBA, mu bidimu bibidi, nebààlukilè.”

¹⁵⁰ Yelèmiyà ùvwa anu kacya wàmutàngila. Cìvwa cibèngàngàne ne Dìyi, ki kuumukayè anu cyanààna. Ki Nzambi kwambayè ne: “Alùkilà ùkamwambilè,” wàmba ne, “Mèmè ncyènakù mwakùle nendè to.”

¹⁵¹ Ùvwa anu musalùke cyanààna. Ùvwa mwangàte didìfwikakajila dyèndè yèyè mwine. Nwamònu anyi? Kàvwakù mwindìle too ne pàvwàye cya bushuwa mwa kumanya ne kàvwa nyèyè, ne ùvwa n’Nzambi ùcyàmba to. Kwalukilayè, musalùke yèyè yònsò. Bu ne . . .

¹⁵² Tùdi tucisangana, mu ditùnga dijimà emu, leelu ewu. Wùmwè wà ku mikàbà yetu ya mèyi wùvwa munkaci mwa kwediibwa mu dìkù kampànda, mùvwà kasùmbù kampànda kàà bambi batwishìibwe anu mwaba awu mene, ne bàvwa bàlwa bwa kubàtìjiibwa mu Dìnà dya Yesu Kilisto. Kadi muntu kukàtamukayè mu cibambalu amu, kwakulayè mu myakulu wàmba ne: “EMU MMÛDÌ MUKALENGE WÀMBA. Shààlaayi bakwàte ku cinùdì naaci aci. Tùngunukàayi anu nanku, nutùngunuka, ne Mèmè nènnùbènèshè.”

153 Bóbò ne: “Ee, piikalàbi ne Mukalenge ngudi mwambè aci, mémè ndi ngeela meeji ne ki cyôci.” Nudi numòna’s, kaciyi cikenkècìbwe ku Dîyi to. Bìdi bìkèngela kwangata Dîyi, dyàmbedi. Ki bwalu abu’s. Cìvwa cibèngangana ne Dîyi.

154 Ki Yelèmiyà udi wàlukila ewu, mupròfetà mwela maanyi awu. Nzambi kumwambilaYè, ne: “Ndi mumanyè ne Hanàniyà mmucìbùle cikòkelu cya mucì aci pa nshìngù pèèbè, cìmvwà Mémè mutèèke, kàdi Nèngènzè cya cyamù.” Yéyè ne: “Nenku matùnga ònsò àdi mayè bwa kukwàcila Nebùkàndànèesà mudimu, musadidi Wanyì awu aa,” wa bwalu yéyè’s ùvwa mumpàngaanu. Nwamònu anyi? Ne Izaleela, balamè milàmbù yabo yònsò ayi, kàdi kabàyi. . . Nwamònu anyi?

155 Nzambi ùvwa mufile mulayi ne, Yéyè ùvwa mwa kubènesha, kàdi mabènesha awu àtu nku mishìngà. Ne bìdi bìkèngela bwa wèwè kukùmbaja mishìngà ayi, ki bwa kufikisha aci ku dikùmbana.

156 Mvwa musòmbe, kwènji katanci, ne mwànà wa bakàji mukese, mupòle maalu kaaba aka. Dyàmbedi, mvwa mukenkète mu dikù adi, bwa kumòna ní mùvwakù cintu kampànda cya cibi. Nzambi neòndopè, kàdi bìdi nku mishìngà. Nwamònu anyi? Cintu cìmwèpelè cìmvwà musangàne, ncya ne, maamù ùvwa ùciina wàmba ne bìvwa bibì bwa kwangata manga. Mémè kwamba ne: “Kwèdikù awu meeji to, mwanèètù wa bakàji. Umùsha aci mu meeji. Ndàaku wèwè anu cyanààna ne mwànà awu. Mupèèshè manga awu. Nzambi ngwàmanyisha aci.” Nwamònu anyi?

157 Mpindyewu, kàdi, bwalu bùdi ne, kupeta, kumanya. Ne pashìshe, cyôci EMU MMÛDÌ MUKALENGE WÀMBA, mbìmpè.

158 Mpindyewu tudi tusangana apa ne, bantu aba, bàvwa bàteeta bwa kukwàtakaja cintu kampànda; Hagàa ne—ne Sarah, bwa kukwàcishakù Abraham, kukwàcishakù Nzambi bwa kufikisha mulayi Wèndè ku dikùmbana. Kwèna mwa kwenza nanku nansha. Kakwènakù mushindu to, nansha kakese, wà kucyènzà. Abi—abi mbibèngàngàne ne byònsò. Dìyi dya Nzambi nedyùlè, nansha bishi. Bùdi wèwè naabù mbwà kwimana pa Dîyi, ne kwamba ne: “Bìdi mushindu ewu,” ne kushààla mulamè Dîyi. Mpindyewu, tàngilàayi, bwa kukwàtakajakù cintu kampànda bwa kwangataci kaaba kàa Dîyi Dyèndè!

159 Pàmwàpa balundà bàà Abraham, bóbò pààbò, bu twètù mwa kwikalakù bamòne, pàmwàpa balundà bàà Abraham bààkalwa kwamba ne: “Ee, taatù wa matùnga, bânà biine baùkaadi naabò bàdi bùngì kaayi mpindyewu?” Piine apu mpàkaavwàye ne bidimu lukàmà’s. “Ambàaku tũng, taatù wa matùnga, taatù wa bààbùngì, bânà biine baùkaadi naabò bàdi bùngì kaayi mpindyewu?” Baseki’s!

160 Mpindyewu, kanwènaayikù bamòne cikondo anyi? Katwènaayikù bacimòne anyi, mîngà misangu yitùkaadiku basambile bwa cintu kampànda, kaciyi cyenzèke?

161 “Muntu mukùlākàjì nyèyè ewu musòmbe,” mùdìbo bàmba. “Yèyè mmpofo. Mmpudimaci. Nkamàmà. Udi ùsaama. Mmwenzè *cikampànda*. Ndàayi kuntwaku nùmwondòpè, nwènu bondopi bàà kùdì Nzambi nwè. Netùcìtàbùùjè.”

162 Bòbò bàdikù bàfika ku dyumvwa ne n'démon umwèumwè wākamba ne: “Tùùluka ku nkùrusè aku, nenku nènKwitàbùùjè. Andàmùnàbi mabwe aa àlwe mampà tūng, nenku nèncìtàbùùjè” awu anyi? Nwamònu anyi? Démon umwèumwè wākaswika Mukalenge wetù mukùsù ku mèsù, ne kuMutuuta mucì mu mutù awu, ne kwamba ne: “Mpindyewu, ní Udi mupròfètà, twàmbilèbi ne wàKutuutù awu nganyì, nenku netùKwitàbùùjè.”

163 Ee, nwènu's nudi bamanyè ne Yèyè ùvwa mumanyè wākaMutuuta awu. Yèyè's ùvwa mwa kwikala mwandàmùne mabwe awu malwè mampà. Anyi, Yèyè's ùvwa mwa kwikala mutùùlùke ku nkùrusè aku. Kàdì tuvwakù bafwànyine kwikala cinyi leelu ewu bu ne Yèyè wākacyènta? Nwamònu anyi? Kì mbamanyè ndongamu wa Nzambi to. Wèwè udi ne cya kujandula cìdì Nzambi mulayè.

Mpindyewu ndi ne cya kulwijakaja.

164 Mpindyewu, mpindyewu bàvwa bafwànyine kwikala bambè ne: “Taatu wa matunga, s'tuvwa bakuumvwè, kùkaadi bidimu makumi abidi ne bitaanu, wamba ne wèwè neùpetelè mwànà kùdì Sarah, ne ku yèyè awu nkùvwa mwa kulwa matungà a bantu. Bàna biine bàukaadi naabò pa dìbà edi bàkaadi bùngì kaayi menemene's, taatu wa matunga wa yààyà?” Huh! Nwamònu anyi? S'nyèyè nyuma mudyudi umwèumwè wa kale utu muswè kudyulangana awu.

165 Abraham wàkenza cinyi? Mbambè ne: “Yèyè kààkatènkakanakù ku mulayì, ku bupidya nansha.”

“Mòna's, wèwè ewu's uvwa musambidile *Kampànda*, kàdì yèyè's nyawù kàyi muumvwè bimpè.”

166 Aci kì mbwalu to. Mèmè musambidile bantu binunu dikumi dilòòlò edi, ne bantu binunu dikumi kufwàbo mu dinda, màalabà dilòòlò nèntungunukè anu ne kulaaba babèèdì maanyi ne kubàsambidila. Nzambi's ngudi mwambe. Kacyèna cìcìimanyika to, nansha kakese. Nzambi ngudi mucìlayè. Mèmè ndi ncìitabuujà. Cya bushuwa's. Cìdìbo bòbò bàmba, kacyèna anu ne cìdìcì cìshintulula to. Kàdì, bòbò nebàsekè. Bundù bwa Dìyì's ki bwòbù abu.

167 Abraham, mwimàne pa Dìyì dya Nzambi, ndekeelu wa byònsò Dyòdì's dyàkuula. Kaa, ekèlekèle!

168 Tàngilàayi disekiibwa dya bunkumba. Musekiibwe, ne dyàmbedi, bundù bwa ku bunkumba. Bàvwa . . . Bìvwa bikèngela

bwa kutwàlayè bundu bwa kwikala nkumba bidimu byònsò abi. Ùkaavwa ne bidimu bìipacila ku lukàmà. Ùkaavwa ne bidimu makumi citeema, ne Dîyì dya Nzambi òwà dyambè ne neikalè pèndè *mukalenge-mukàjì* adi, maamwèndè wa mwànà awu. Ne yéyè ne Abraham, bankumba, mibidi yabo—yabo bònsò babidi anu mifwè yetu eyi, kàdi nansha nanku kabàyikù bèèla mpatà ku Dîyì adi to, nansha kakese. Kàdi bìvwa bìkèngela bwa kutwàlabò cyòci aci, dyambedi. Ne pashiishe, aleluuyah, Nzambi kushààla Yè mukwàte ku Dîyì Dyèndè, mu dîbà dya bwalu bukolè adi: Izàkà kulediibwayè. “Ne dimiinu dyèndè didi mùdi lusenga lwà ku kaalà kwa mbù anyi bu mitooto ya mu Dyulu.” Nwamònu anyi? Nzambi ùtu misangu yònsò anu wàndamuna ku Dîyì Dyèndè. Eyowa. Bunkumba dyambedi, pashiishe Izàkà.

169 Zakàayi ne Èlizàbèètà, bya mwomùmwe, mulùme mununu ne mukàjì mununu awu, batungùnùke anu kacya bàakwàta. Nenku pàakafikà Zakàayi mwab’awu, ne kufundayè pa dibaya dyèndè, wàmba ne: “Mwanjelo mmutwilàngàne naanyi, mungambile ne nèndelè mwànà ne Èlizàbèètà, mukàjàanyi mununu ewu. Nciyenà kabidi mwa kwakula to. Nkàadi kamàmà. Nènshaalè kamàmà too ne ku ditùkù dyàlediibwà mwànà awu. Kàdi kùlwalwa mwànà, ne yéyè neikalè mupròfetà wa Mutàmbe bunene wa mu Dyulu. Yéyè ngwáleeja Mutooto wà mu Dinda ku bantu. Yéyè ki mudyànjididi wa Maasiyà.” Bivwakù bifwànyine kwenzeka munyì’s?

170 Bàmwè bàakamba ne: “Mukwàcikwètù. Kaa, ngeela—ngeela meeji ne wányungùlùku mutù ndambù, nudi bamanyè’s. Kùdi kaacintu kampànda. Kàdi anjì tàngilàayi pèènu anu Èlizàbèètà mununu wàwa, ne bidimi bìipacila ku makumi mwandamukùlù. Kàdi anjì tàngilàayi—tàngilàayi—tàngilàayi Zakàayi, mununu biyè ne mwa nàka ne ùzakalala, ne pashiishe ùlwa kwamba cintu cya mushindu awu. Ee, mukwàcikwètù.”

171 Kàdi ùvwa ne Dîyì dya Mukalenge. Bundù kaayi, mu mushindu wà ne mukàjèndè wàkasokoma matùkù búngiwù. Kàdi wàkashààla ne Dîyì. Kaa, ekelekèle!

172 Bàbènga dimanyika, bàbènga mmwènenenu wa mwasàkànaayi, bàakabènga bintu bya kapelu bya ditùkù adi, ne mishindu ne bintu bya matùkù àbò awu abi. Bàkabibènga. Bàakabènga kwenda pàmwe ne musumbà wà beena bupidyà awu. Bàakababènga bintu bya pa buloba. Byàkakèngela bwa kwenzabò nanku, bwa kushààlabò ne Dîyì dya Nzambi. Byàkakèngela bwa kwenzabò nanku.

173 Ki mùdibi kabidi leelu ewu. Udi uditàpulula ne byònsò pa kuumusha wèwè ne Nzambi. Kì nciidi ekeleeziya wènta to. Ncyùdi wèwè wènta ne Nzambi. Nwamònu anyi? Ngwèwè, bu muntu-nkààyà. Eyowa.

174 Kàdi tàngilàayi cyàkamupèeshà Nzambi. Pàakalwà Yesu Yéyè mwine, Zakàayi ùkaavwa mufwè, ne Èlizàbèètà kabidi.

Kàdi mwanààbò mulela wa balùme awu pààkafikàye mu cipèèlà, ne EMU MMÜDÌ MUKALENGE WÀMBA, Yesu wàkamba ne: “Kacya kakùtukù muntu mulela kùdi mukàji munene bu yèyè to.” Amen. Ncinyi aci? Wàkatwàla bundù bwa bunkumba. Wàkashàala pa Diyì, ne wàkalela mwànà wa mushindu awu.

¹⁷⁵ Mwàkadì Sarah wa kale awu, mwàkadì Abraham wa kale awu, babàkà bàà kale abu bààkashàala kacya bààkwàtaKù. Mònaayi, bààbùngi bàà ku bàkaavwàku balediibwe, “mùdi lusenga lwà ku kaalà kwa mbù,” kakwènàkù cisà cya bantu pa buloba apa bùngi mùdi beena Yudà nansha. “Mùdi lusenga lwà ku kaalà kwa mbù anyi mitoodo ya mu dyulu.” Cívwa cyenzèke ncinyi? Cyàkènzekela mu banyààbanyà, mu mwànà umwèpelè.

¹⁷⁶ Mpindyewu nudi bamòne kùndi ngenda nya aku. Mwànà umwèpelè, ki cyònsò cyàkàkèngediibwà. Byàkàkèngela mwànà umwèpelè bwa kunyungisha matùnga ne kufunkuna Maasiyà. Byàkàkèngela umwèpelè, mutùmikidi. Ncya bushuwa. Nzambi ùdi dijinga anu ne muntu umwèpelè cyanààna. Ki cyònsò cidi cìMukèngela, mwaba kampàndà wùdiYe mwa kwikalakù ne diyì. Ki cyònsò cidiYe muswè, kupetakù muntu umwèpelè ku bukòntononyi Bwèndè. Kaa, mwine mùtùYe munangè kupeta muntu umwèpelè's wè!

¹⁷⁷ Wàkapeta umwe ne dìnà Noà, musangu kampànda. Wàkapeta—Wàkapeta umwe ne dìnà Mòsà, musangu kampànda. Wàkapeta umwe ne—ne dìnà Yelèmiyà. Wàkapeta—umwe ne dìnà Eliyà. Wàkapeta umwe ne dìnà Elishà. Wàkapeta umwe ne dìnà Yone. Yèyè—Yèyè ùdi ùpeta. . . Wàkapeta umwe ne dìnà Shimishòna. Pàdibi anu ne Ùdi mwa kupeta muntu umwèpelè ku bukòntononyi Bwèndè, ki Diyì Dyèndè dya mukana ndyòdi adi. Yèyè ùdi mwa kwakwilamù. Ùdi mwa kupiùsha bàà pa buloba. Kaa, ekèlekèle!

¹⁷⁸ Mwine mùdiYe ùjinga ne mwoyi mujimà ne ùtàtà's wè, bwa kupetakù muntu ku bukòntononyi Bwèndè ne: “Bwa Mmònèkù mwa kwakwila ku yèyè. Ndikù mwa kwenza ne Diyì Dyànyì dya mukana dimanyikè. Nansha mwàtwàleye bundù, kàdi Nèngènzè bwa Diyì Dyànyì dya mukana dimanyikè.” Nwamònu anyi? Kaa, eyowa's.

¹⁷⁹ Dyàmbedi, bunkumba. Bìkèngela ikalè nkumba, bìkèngela àtwalè bundù bwa bunkumba. Byàkàkèngela bwa Sarah kubùtwàlayè. Ki mùvwà Zakààyì ne Èlizàbèètà ne cya kubùtwàla pààbò.

¹⁸⁰ Tàngilàayi, leelu ewu. Mpindyewu nèngiikalè mwa kwambakù cintu kampànda. Tàngilàayi leelu bânà bàà ndumbà awu abu. Mmukwàte matùnga ku bukòkeshi bwa cididi bwa dīgumba, ndumbà awu ne bânà bèndè bàà bakàji. Tàngilàayi nùmonè cidi lukòngò lwà màngumba lujjuulè, ne mushindu wùdi baakàne bakese. Kanùtácishikù meeji to. Shààlaayi ne Diyì. Abi mbimpè.

181 Bàdi mwa kukuseka, kukubiikila munsantu mubùnguluki wa mu malaba. Mbafwànyine kukutwà mênà ònsò, ne dìnà dibi dya mushindu kanà wònsò. Kàdi, shààla wêwè anu mwaba awu, Cidi n'Diýì, bundù bwa Diýì, cintu ciine cyàkwambàbo aci.

182 Nsongààlùme kampànda, ùdi mwa kwikala kaaba aka mu dinda emu. Yèyè mmulundà wanyì; Jim Poole, Jim mwànà, fàmiyè wabò—wabò. Bàvwa bamukonkè ditùkù adi. Ee, ùvwa mubàtìijiiibwe kaaba aka. Muntu kumwambilayè, ne: “Wêwè ne cya kubàtìijiiibwa mu ekeleeziya kampànda, bwa cinyì kùyikù musungùle ekeleeziya munene, anyì cintu kampànda?” Nwamònu anyì? Kàdi yèyè ùvwa mumòne Bukènkè. Cìvwàku ncyòci aci. Nwamònu anyì?

183 “Bànà bàà babi mbàdi bààbùngì kutàmba bànà bàà baakàne.” Eyowa's. Eyo. Mushindu mwine wùdìbo bakese's wè, bànà bàà baakàne abu! Tàngilàayi dyanza dikese dìvwàku mu ditùkù dya Noà. Nwamònu anyì? Tàngilàayi cìvwà mu matùkù a Sodomà. Nwamònu anyì? Bukese bwine bùdi baakàne's wè!

184 Bùngì bwine bwa bànà bàdi naabò ndumbà awu's wè! Yèyè ùdi ùlela bànà anu mu mushindu kanà wònsò, kadi bònsò abu's mbànà bàà panshi. Ndumbà ùdi ùlela ndumbà. Mbwa ùdi ùlela mbwa.

185 Kàdi Kilisto ùdi ùlela beela maanyi. Bible ùdi ùlela baakàne, pa nanku bikèngela twètù kutwàla meeji a ne tudi kaamusumbà kakese awu. Cintu cya ngàsà kaayìpu's wè!

186 Tàngilàayi ekeleeziya munene wa Efèsò awu, mùvwa bantu anu dikumi ne babidi cyanàànà. Eyowa's. Tàngilàayi musumbà wutùdi naawù leelu, ku lwabo luseke. Eyowa's.

Kùvwa misùukà anu mwandamukùlù cyanàànà mu matùkù a Noà.

187 Kùvwa anu bataanu cyanàànà mu matùkù a Lotà, to, banaayi; Lotà ne mukàjèndè, ne bànà bèndè bàà bakàjì babidi. Kàdi mukàjì wàkandamuka dikunji dya dibwe paanyimà pàà yèyè mumanè kupàtuka, mu kutàngila kwa paanyimà. Mu bushuwa bwa bwalu, basatu mbàakapàtukà mu ditùkù adi.

188 Ne Yesu wàkamba ne: “Anu mwàkadìbi mu matùkù awu amu.” Bìdi ne musinga kutùdi bwa kutàbala ne kwikala badimùke. Bukese bwine bùdi baakàne's wè! Kàdi, anu mùtùbi kwònsò eku, baseki bàdi ne cya kwelangana bundù. Bankumb-...Dyàmbedi, kutwàla bundù bwa bunkumba. Ekèlekèle!

189 Bikèngela anu ndwijakajè. Ndi...ncyèna...Ndi muswè kukwàcishakù bwa kupèèsha bànà aba. Nùntwàlaayikù anu kakese cyanàànà. Nwamònu anyì?

190 Bantu bàdi anu bàà mwomùmwè misangu yònsò. Mpindyewu ndi muswè kwamba kabidi cintu kampànda. Ne ndi muswè bwa nwènu...Ne ncyèna mumanyè ní cidi cikwàciibwa

pa mikàbà ya méyi anyi to. Kàdi cyôci pa mikàbà ya méyi, ndi muswè nüntèèlèjè, nwènú bàdi bàtèèleja mukàbà abu. Kacinùpìci to, kàdi cìlongàayi. Muntu ùdi mpindyewu anu mùtùye misangu yònsò amu. Ùdi ùtùmbisha Nzambi bwa citùYe mwenzè; ùtèkemena cyènzàYe; kàdi ùlèngulula cyènjiYe ne cìdìYe munkaci mwa kwenza. Ùdi ùtùmbisha Nzambi bwa citùYe mwenzè; ùdi ùtèkemena cyènzàYe; kàdi ùdi ùlèngulula cìdì Nzambi munkaci mwa kwenza, ne mwaba awu cintu cyònsò mu kaabujimà cimupita. Ndi ntèkemena ne bàdi bàcyùmwa. Nwamònu anyi? Ùlèngulula cìdìYe munkaci mwa kwenza! Yèyè mmumanyè cìdìYe mwenzè; ne mmumanyè mulyi wà cyènzàYe; kàdi ùpanga kumòna cìdìYe munkaci mwa kwenza.

¹⁹¹ Kaa, nwènú beena Mpenta, ní kanwènakù cileejilu cya cyôci aci's we! Nudi nutèkemena bwa cintu kampàndà kwenzekaci; mùtùbi misangu yònsò, ncyenzèkènzèke nwènú badimwène, kàdi nwènú kanùyì nucimanya to. “Mmisangu bùngi kaayi yìkaadiYe muswè kunùkùngwija, mùtù nzòòlo ùkùngwija twànà twèndè, kàdi nwènú kanwèna baswè to.” Bilèlè byenu ne màngumba ènú bìdi ne mushinga kunùdì kutàmba Dìyi Dyèndè ne Nyuma Wendè. Eyowa's.

¹⁹² Bundù kaayi kùdì Mariya! (Patùkaadi tujikija apa.) Bundù kaayi kùdì Màriyà ne Yòzefù, bwa Dìyi Dyèndè! Ncikondo cya Noël. Mvwa ndongolola bwa kunùlamakù anu ndambù mukese, kàdi nenùbyùmfwè bùngi cyanààna ku bisanji ne munkaci mwa bampaasàtà, ne bikwabo. Bundù kaayi kùdì Màriyà ne Yòzefù, bwa kushàala bakwàte ku Dìyi dya Nzambi dya mulyi! Vùlukàayi, mpindyewu. Ne didiyombola, dya bàtwàngaja ne makìkì, pàvwàbo bà mòna Màriyà mwànà awu ùpita, bà mòna ne Yòzefù. “Wèwè's udi usèla ndumbà.” Nwamònu anyi? Nenku vùlukà, mwanèètù wa balùme, masandi a babàka àvwa lufù mu miine matùkù awu. “Mpindyewu, cyùdi wenza's mbwà kabàmushebèyi. Yèyè's ùdi ne difù dyebe.” Nenku, kàdi, vùlukàayi ne, dìbà dyònsò adi, Nzambi ùvwa ùtàngila bwalu bwàbò, ne civwa bilondèshile Dìyi. Kàdi bòbò kabàvwa bacimanyè to. Nwamònu anyi?

¹⁹³ “Virgo neàlèlè mwànà.” Yòzefù ùvwa mumanyè cyôci aci. Màriyà ùvwa mumanyè cyôci aci, bwalu, paanyimà pà Dìyi dimanè kufùndiibwa, kùvwa Mwanjelo wàkula naabò, ùshìndika, anyi ùmwènesha Dìyi diine òvwa difùnda adi, òvwa ne cya kwenzeka adi. Mpindyewu kanùlòòtakanyi to. Elàayi meeji. Nyuma Mwìmpè wàkapweka pa buloba; kààkaakulakù ne disangisha dijimà to. Wàkaakula naabò bòbò.

¹⁹⁴ Yòzefù kutàngilayè. Ne kumpàlà kwa Mwanjelo awu kumumwènekela, yèyè wàkamba ne: “Ee, mpindyewu, mèmè ndi mumunangè. Kàdi, mèmè ndi muntu mwakàne. Ncyèna mwa kusèla mukàji wa mushindu awu to.”

195 Ki Mwanjelo wa Mukalenge kumumwènekela Yè, mu cilòtâ, kwamba ne: “Yòzefù, wèwè mwânà wa Davidi, kùciinyi bwa kwangata Màriyà mukàjèèbè pàmwè neebe to, bwalu cidìye mwimite munda mwèndè aci ncyà kùdì Nyuma Mwîmpè.” Kaa, ekèlekèle! Busàmbi kaayi! Nwamònu anyi?

196 Nenku, Màriyà, mu njila wènda ùya ku ciinà cya mâyi. Virgo mutekète awu, wa bidimu biipacila ku dikumi ne mwandamutekète, anyi dikumi ne mwandamukùlù, usèdiibwa kùdì mulùme ukàävwa mumanè kusèlangana kumpàla ne mulelè bânà bànaayi; muntu mukolè. Kàdi yeyè ùvwa. . . Ùvwa munangè mulùme awu, kàdi—kàdi kàvwa mumanyè ne mbwà cinyi to. Ne mulùme ùvwa mumunangè, kàdi kàvwa mumanyè ne mbwà cinyi to. Nenku’s ki bôbò abu mwaba awu. Ùlwa, wènda ùya ku ciinà cya mâyi, bwa kusuna mâyi, ne dilonga dyònsò pa maalù àvwàye—àvwàye munkaci mwa kwela meeji, Mifundu’s, kakùyì mpatà to, ne dîbà adi Bukènkè kampànda kupenyabù kumpàla kwèndè. Pàakapenyà Bukènkè abu, ki Mwanjelo udi mwimane awu.

197 Nudikù nudikonka mwàkadyùmvwà Màriyà mwânà awu anyi? Nukàadikù bakwèlèlè meeji anyi? Ndi ndikonka ní wàkawkàcika bwòwà bu mèmè makèlèlèlè awu’s.

198 “Mwoyi awu, Màriyà!” *Mwoyi awu* mbwena kwamba ne “imànà.” “Tèyakù ntèmà ku cindì muswe kukwambila eci. Udi mubènèshìibwe munkaci mwa bakàjì, bwalu udi mulengèlèlè Nzambi, ne wèwè neùlèlè Mwânà. Kùyì mumanyàngàne ne mulùme to, kàdi neùlèlè Mwânà. Ne mwanèènù wa bakàjì Èlizàbèètà, yèyè pèndè, mwikàle mununu, mmwimite pèndè difù, ne neàlèlè mwânà. Ne bimanyinu ebi nebyènzekè.”

Yèyè kwamba ne: “Nebyènzekè munyi, mèmè ncìmanyanganyi ne mulùme?”

199 Yèyè ne: “Nyuma Mwîmpè neàkubwikile mundidimbi. Cintu cya Cijila cyàlediibwà kùdì aci necìbiikidiibwè ne Mwânà wa Nzambi.”

200 Baseki bàmbe byònsò bìdìbo baswè kwamba abi. Yèyè ùvwa mucimanyè. Ùvwa mumanyè ne necyènzekè, bwalu Nzambi nguvwa mwambè.

201 Mpindyewu, mùvwàye ne cya kwikala mudyùmvwè, ditùkù dya dilàmbula adi, anyi dilwa bwa ditengudiibwa dya Mwâna wa mu dibòko awu adi, pàvwàye wènda ùya ne Mwânà mukese ewu mu mabòkò èndè, mushindu *ewu*. Ne bakàjì bònsò biimànyine mu ntàntà, bònsò ne bilàmbà byoya ne màndà bilenga, bwa kulàmbulabò bânà bààbò bàà mu mabòkò ne kubàtengwisha, ne pàmwè ne bònsò bènda bàkòka mwânà wa mukooko. Kàdi yèyè ùvwa ne tuumàndànkùci tubidi, dikezudiibwa bwa ditòokeshiibwa dyèndè yèyè mwine. Mwânà mukese awu mujìngila mu mukùsu wà cilàmbà, mwenza ne cikòkedi cyumusha paanyimà pàà nshìngù wa ngombe, cikòkedi,

cilambà cya dijìngila paanyimà pàà ngombe. Cìvwa anu mukùsù wètù wa mu cidìilù cya nyama ewu. Kabàvwakù ne cintu Bwèndè Yèyè to. Bàvwa balanda bàà dikèma. Nenku ki yèyè udi mwimàne ewu.

202 Kakùyi mpatà to, bakàji bônso bàvwa biimànyine mu ntàntà ne virgo mutekète awu. Bàvwa bàmba ne: “Nudi numòna’s, ùdi ne mwànà mulela mu masandi.” Mònaayi mùdì Nzambi wènta bintu bimwèka bya dyumisha naabi maalu. Kaa, ekèlekèle! Yèyè’s ùdi wènta anu Sàtaanà diyelè cyanàànà. “Bukooyà kaayi’s wè! Manyaanu kaayi’s wè! Masandi’s. S’ki cidìye. S’mmukàji ngèndààmàsàndì.” Aci kacyaakiimanyikakù dituuta dya mu mwoyi mukese wà Màriyà adi to. Bàvwa biimànyine kule Nèndè.

203 Bòbò’s bàcìdi anu bènza cintu cimwecimwe aci, bàMubiikila mpindýewu ne: “Munsantu mubùnguluki wa mu malaba, anyi mukoleshi wa maalu,” anyi cintu kampànda.

Màriyà ùvwa mumanyè ne mwena Mwànà awu Nganyi. Ùvwa anu mutùngùnùke, anu bu ne kakùvwa bwalu.

204 Kàdi, kaa, kabìvwakù bìkèngela bwa kwikalabò bamòne ne, Simèònà, lwà paanyima pàvwàye musòmbele mu cibambalu aci apu, ùvwa mupetè mulayi anyi? Wàkaya wènda ùnyùngulukangana, wàmba cipròfeta. Kwambayè ne: “Mukalenge mmummwènèkèle.” Ne yèyè ne: “Ncyàkumòna lufù to . . .” Ne ùkaavwa ne bidimu makumi mwandamukùlu ne bya mu njila piine apu. “Ncyàkumòna lufù to kumpàlà kwa nciyi mwanji kumòna lupàndù Lwèndè.”

205 “Kaa, Simèònà, s’ukàadi mununu’s, mwanàànyì. Webè—webè . . .Mukùlumpè ewu’s wènji bu wajimiji lungènyi, nudi bamanyè’s, ùdi ndambù . . .Mulekèlaayi. Kèna njiwù to. Kààkwenzelakù muntu bibi to.”

206 Kàdi Simèònà ùvwa ne Dìyì dya Mukalenge, yèyè ne: “Mvwa mumòne Nyuma wa Nzambi ùmpwekela. Mémè kwimana ne kuMutàngila. Yèyè kungambila ne: ‘Simèònà, wèwè ùtu muntu mwakàne. Nenku kwàkwikala mwa . . .Nènkuvwijè bujaadiki mwaba awu.’” Uh-huh. Kwàjikì.

“Ciine aci ne Ùcyènzèlè cinyi, Mukalenge?”

“Aci nciNtàngile Mémè.”

207 Wanyì mmwènenenu ùdi ne, mbwà Yèyè wàmòna mwa kubàdyula bushuwa, mu Ditùkù adi. “S’nwàkapeta bujaadiki. Kanwàkabùtèeleja bwa cinyi?”

208 Ki mpofo mununu Anà wàwa, musòmbe mu ntempèlù amu, ùsambila. Mukalenge kumubuulwila Yè ne: “Simèònà ùdi wàmba cya bushuwa.” Amen. Kàvwakù mwa kutàpulula kutòoke ne bufùkù to, kàdi ùvwa mwa kumòna kule kutàmba bantu bààbùngì bàdì ne mèsù mimpè leelu ewu aba. Yèyè wàkamòna, mu Nyuma ne, dilwa dya Maasiyà divwa pabwìpì, Nyuma ùnyungakana munda mwa mwoyi wèndè.

209 Nudi numòna cìvwà Ekeleeziya mukese menemene awu anyi? Zakàayi, Èlizabèetà, Màriyà, Yone, Anà, ne Simèònà; basambombo pa miliyò ne miliyò. Byenzè bu mu matùkù a Noà's. Basambombo beetu aba. Nzambi ùvwa mwakùle ne yònsò wa kùdìbo. Bàvwa bònsò mu dipetangana. Bàvwa bònsò badìsàngìshe. Amen.

210 Ki mukùlumpè Simèònà nyèyè ewu. Ki Mwânà mukese awu nyewu ùbwela. Kàvwakù mwanjì kuumvwa kantu nansha kàmwè pa bwalu abu to. Ki Mwânà nyewu. Ne dîbà adi Simèònà ùvwa musòmbe mu cibambalu cyèndè, ne Nyuma kumutùulukilaYè, kwamba ne: "Pàtukà, Simèònà."

211 Ki yèyè uyàaya ewu, tàmakàtàmakà, kàyi mumanyè kùvwàye ùya to. Byenzè bu Abraham, wènda ùkèbangana ne cintu kampànda. Kàvwa mumanyè ne cìvwa penyì to, kàdi wàkatùngunuka anu ne diya. Paanyimà pàà katancì, yèyè kwimana. Ne Nyuma Mwìmpè ùvwa ne cya kwikala mumwambìle ne: "Ki Yèyè awu."

212 Kwololayè byanza, mu mabòkò a Màriyà, kwangatayè Mwânà awu mu mabòkò èndè yèyè. Kutàngilayè muulu e kwambayè ne: "Mukalenge, lekèlaku mpindyewu musadidi webè àye mu ditalala. Mésù àanyi ngaà matàngìle lupàndù Lwèbè." Cintu cìvwà bantu bònsò beèlulwila aci's, cìvwà bakàjì bèèpela aci, Simèònà yèyè kwamba ne: "Ndupàndù Lwèbè, Mukalenge."

213 Nenku pa dyòdì dîbà adi, ki mukàjì mununu mpofo ulwàlwa ewu, wènda wènda ùtetuka, ùpicila mu batèèlejì amu wènda ùtetuka. Ki kulwayè too ne pàvwàYe apu, ne kwambayè pèndè cipròfeta, bwalu ùvwa muMwindìle Yéyè. Kwambilayè Màriyà ne: "Mwelè wà mvità newùtubulè mwoyi wèbè, kàdi neWùjandulè meeji a mu myoyi yàbùngì." Nwamònu anyi? Cìvwa ncinyi?

214 Mpindyewu, ngeela meeji ne, bàmwè bàà ku bakàjì abu bààkamba ne: "Mpindyewu kàdi mònaayi anu bwalu! Nudi numòna ne ncipidì cya mushindu kaayi ciine aci anyi? Bwalu mbwabù's. Nwamònu anyi? Ki cyòcì aci's. Nwamònu kwàyi bwalu anyi? Muntu mulùme mukùlumpè wàwa, mutù's mmumwelè mitanta. Ki yèyè wàwa, mwimanè kumpàlà kwa nsongàakàjì ndumbà wàwa, ùteeta kwamba cintu bu nanku awu. Ki bwalu mbwabù's. Mwânà mulela mu masandi wàwa. Tàngilàayi anu Anà mununu wàwà, musòmbe kaaba aka, ùdishebeya ne nzala, ne ùtùngunuka mushindu awu. Yèyè kàtukù muswè kuumusha luteetùkù bu twètù aba to. Kàdi, ki bwalu mbwabù's, nwamònu's. Yèyè's ùvwakù mufwànyìne kwikala wa mu bantu bàà maalu manene muneemu emu. Mmupàtùkile mu dìkù dilenga dya dikèma, nwamònu's, ne yèyè's ùvwakù mwa kwikala wa mu bòbò abu. Kàdi ki yèyè

awu's. Nudi numòna mùdì musùmba awu wùdisanga anyi?" Kaa, eyowa's. Amen.

215 Cintu cimwecimwe aci leelu ewu. "Basòmbe mu myaba ya mu Dyulu mu Kilisto Yesu, batùntumuna kùdì Nyuma Mwímpè." Bushuwa. Eyowa's, mukalenge.

216 Kaa, tudikù ne ndambù mukwabo mukese wa dībà anyi? Bikèngela ngàmbèku cintu kampànda. [Disangisha dìdì dyàmbe ne: "Eyowa."—Muf.]

217 Ndi ne muntu mukwabo kaaba aka, ùndì ntàngila, mu cikondo aci pàvwà Dìyì munkaci mwa kumwèneshiibwa, beena meeji abu.

218 Mvw'a kujingakù ngíkala ne dībà's, Fred, bwa wèwè kubala aci. Udi naaci mu mpaayà amu anyi? [Mwanèètù Fred Sothmann ùdì wàmbe ne: "Eyowa."—Muf.] Ngeela meeji ne bààbùngì bàà kunùdì mbacimòne mu cikàndàkàndà.

219 Cintu cyàkambà Nyuma Mwímpè ku musùlù eku, kùkaadi bidimu makumi asatu ne bisatu, mbafùme ku dicijuula. Mu matùkù 9 a ngondo wa dikumi ne mwibìdì, mbaciijaadìke, ku dilonga dya mabùlùngà a muulu, mùdì Jupiter awu—awu ne mitooto ayi, mu kasùmbù kààyì!

220 Badi ne kabala-matùkù kàà kale kàà dilonga dya mabùlùn-...babifùnde, mbabijuulè. Pa dībà adi menemene mpàvwà kasùmbù aka kabwelè, mu kasùmbù kàà miine mitooto eyi, ne kakùpìlwe panshì katàngile mu Baabùlònà, ki beena meeji abu kukàfikishabò panshì. Nudi bavùlùke anyi? Yòyì kukòsolola bijèngù byàyi, kuyayi panshipanshì, mitàpùlùke cyàkàbìdì mu ntàntà wa miliyaalà ya bidimu bya bukènkè. Neku beena meeji bàà beena Yudà bàvwà mu Baabùlònà mwàmwa abu, bààkamòna kasùmbù aku kàkabwela mu kasùmbù aku, mu mitooto ayi. Yisatu ya ku yòyì ayi midisangè pàmwè, ne myenzè mutooto wùmwèpelè wà mu dinda awu. Ki kumanyinabò aci ku Dìyì dya Nzambi ne, ki cikondo ncyòci aci, pàkadisangà mitooto ayi ne, Maasiyà ùvwa ne cya kwikala pa buloba.

221 Ki bwa cinyi bààkabanga kwamba ne: "Ùdì penyì Yéyè awu, udi mulediibwe Mfumu wa beena Yudà awu? Ùdì penyì? Mwaba kampànda! Bwalu, pààbwelàkànyì mitooto ayi apu, mu mushindu wà ne mibidi yàyi ya mu dyulu milwè mubidi wà mu dyulu munene wùmwèpelè pànwapa, pàdì yisatu ayi yidìsanga, Maasiyà neikalè pa buloba pa dyòdì dībà adi." Kàdì pààkabwelàyi mu bijèngù byàyi, bantu abu bààkamanya ne Maasiyà ùvwa pa buloba.

222 Bòbò bàvwà bamanyi mu citùpà cyabo cya mudimu aci. Bàvwà bantu banene. Bòbò bàvwà bamanyi mu citùpà cyabo cya mudimu cya maalù a mamanya a ntèndeleeu aci. Bàvwà bàkenketa luseke lwàcì lwà ntèndeleeu. Neku bààkamòna mitooto ayi yiya kuntwaku, Jupiter ne Sargas, ne pashiishe

yibwela mu mulongo wàyì—wàyì. Ki kwambabò ne: “Tudi bamanyè ne Maasiyà ùdi mwaba kampànda. Pa nanku, Ùdi ne cya kwikala mu Yelusàlèmà, bwalu awu ki cimenga-cikùlù bwa ntèdeleelu wa buloba bujimà, wa ntèdeleelu wa Maasiyà. Ki cyàbò ciimamwëndè wa bukalenge. Ki ciimamwëndè wa bukalenge cya cyena-màngumba. Ki mùdi cisumbù cinènè cya butèdeleedi cisanganyiibwa.”

²²³ Ki kuyabò babànde pa tuumeelù, munda mwa bidimu bibidi, bàsabuka Musùlù wà Tigre, ne bapicila mu bisènsè ne mu bisuku ne meetu, lwendu kacya lwàmòngana, batàngile ku cimenga aci, myoyi myùle tètè ne disànka.

²²⁴ Bààkamanya pàvwà anu mitooto ayi milembèlèle muntwamu apu. Ne ciine eci, nansha mene balongi bàà mabùlungà a muulu bàdi bàmba leelu ewu, ne: “Mu bushuwa bwa bwalu, mitooto ayi, yôyi anu mibwelè cyàkàbìdi mu mwaba awu, mmifwànyine kumwèka bu mutooto wùmwèpelè, bwa kuumukila mwaba wùvwàbo bàsanganyiibwa, biikàle batàngidila awu.” Kàdi bìvwa bikèngela bwa kusanganyiibwabò mu mwaba awu, bwa kucimòna. Amen. Amen.

²²⁵ Mbilondèshile mwaba wùdi mwimànyine. Mbilondèshile cyùdi mutàngile. Uh-huh. Eyowa.

²²⁶ Ki kuwùmò nabò, ne kuwùlondabò, ne bàvwa anu mu mulongo menemene. Nansha bakabwelè penyì, wòwò wùvwa anu naabò mu mulongo wùmwè. Wùvwa wènda wùbàlombola. Nwamònu anyi?

²²⁷ Mushindu awu ngùdibi bikèngela bwa wèwè kutèeka Mifùndù yònsò mu mulongo, bintu byònsò, pashiishe kushàala mu mulongo awu pàmwè ne Mifùndù ayi. Ki mushindu wùmwèpelè ngwòwò awu. Necikulombòle buludì too ne kùdiYe. Ncyènzàci bushuwa.

²²⁸ Mpindyewu mònaayi. Ki bôbò bàlwalwà aba, bènda bèela mbilà ne: “Ùdi penyì, Udi mulediibwe Mfumu wa beena Yudà awu?” Kubwelabò mu Yelusàlèmà, Mutooto awu kubàlombolamù buludì, buludì too ne mu ciimamwëndè wa bukalenge cya cyena-màngumba aci. Kàdi mbenzè anu bùùmushakù mèsù batàngila ku luseke anyi, Mutooto awu wumba wùbàshiya. Kubwelabò mu cimenga amu, bàbànda bàpwèka ne mùsèèsù. Bàvwa beela meeji ne beena mu cimenga amu bàvwa bafwànyine kwikala bùle tètè ne disànkà dya Nzambi. Bàbànda bàpwèka ne mùsèèsù, ne disànka, bènda bàya, bèela ne mbilà mikolè ne: “Ùdi penyì Udi mulediibwe Mfumu wa beena Yudà awu? Tudi bamòne Mutooto Wèndè patùvwà mu Esètè, nenku tudi balwè bwa kuMukuukwila.”

²²⁹ Vùlukàayi ne, Mutooto awu, bôbò bàvwa bàya batàngile ku wesètè. Bàvwa mu Esètè. “Mutàngile ku wesètè, wènda ùlombola, mutùngùnùke anu ne lwendu. Tùlombòlèku too ne ku...” Nwamònu anyi? Kakùyì mpatà to bôbò bàvwa...

Bàvwa . . . Ee, Baabùlònà ne Inde bidi bìsanganyibwa ku Esètè kwa Pàlèstinà, byenzè bu pankaci pàà sud ne esètè. Nenku bôbò bàvwa bàya batàngile ku wesètè. “Mutàngile ku wesètè wènda ùlombola,” s’nutu bamanyè musambu awu, “mutùngùnùke anu ne lwendu. Tùludikèku too ne ku Bukènkè bupwàngàne abu.” Nwamònu anyi? Bôbò, beena meeji abu, bàvwa bàlwa batàngile ku wesètè. Bùùmukila mu Esètè, batàngile ku wesètè, ki kumònabò Mutooto awu. Mpindyewu, bu ne bàvwa mu Wesètè, bàtàngila paanyimà, kabàvwa bà Wùmòna to. Nwamònu anyi?

²³⁰ Bôbò, pààkakùfikàbo, Wôwò wàkabàlombola buludi too ne kwòkò aku, pashìishe kubàshiyaWù. Ki kudyàmbidilabò ne: “Ki pôpò apa. Mutooto wàyi, nenku mpòpò apa.” Bàdi mu cimenga. Pa nanku: “Kaa, ekèlekèle,” mwàkambàbo, “bantu bônso bàdi anu bìmba misambu ne biikàle ne disànka. Butùmbi bwa Nzambi mbukenkèshe pa bintu byónsò. Pa nanku, s’ki twètù aba. Tudi bamanyè ne cyètù—udi bamanyè ne cyètù cyenzi cya bulòbò, patùvwà tubandila kasùmbù kàà mitooto aku apu, kakùyi muntu nansha umwe, mumanyi nansha umwe, mufwànyinekù kubànda muulu mwàmwa ne kutwàngaja mitooto yàya to. Ne tudi bamanyè ne, piikalà—piikalà mitooto yàya mwa kubwela mu mubidi wà mu dyulu wàwa, ki dībà didi Maasiyà pa buloba. Maasiyà ùdi pa buloba.”

²³¹ Ne ku musangu ne ku musangu paanyimà pa bidimu nkàmà búngi kampànda, yìdi yìpicila cyàkàbìdi mu kasùmbù kààyì aku, nudi numòna’s, ne dībà adi kùdi kùlwa dipà kampànda pa buloba. Mònaayi.

²³² “Maasiyà ùdi pa buloba, pàdi—pàdi cisùmbù cya mitooto aci cidisangè pààpa.” Nenku bàvwa bamanyè ne Yéyè ùvwapù, ki kuyabò ku ciimamwèndè wa bukalenge cya ntèndeleeleu, ne kubangabò kuya, kwamba, bàbànda bàpweka ne mùsèsùsù, pa tuumeelù etu ne: “Ùdi penyì? Ùdi penyì? Ùdi penyì Udi mulediibwe Mfumum wa beena Yudà awu? Tudi bamòne Mutooto Wèndè mu Esètè. Ùdi muneemu mwaba kampànda. Ùdi penyì? Ùdi penyì? Ùdi penyì?” Huh! Bundù kaayi’s wè!

²³³ Kuyabò kùdi mwakwidi munene. Awu kwambayè, ùvwa mufwànyine kwikala mwambè ne: “Mbwalu kaayi ebu’s nwènú balùmýàna? Mòna’s, nwènú musùmbà wa bakoleshi bàà maalu aba!” Nwamònu anyi? Bundù kaayi, pa cyenzi cya bulòbo cya maalu a mamanya! Ku bukolè bwa Nzambi, bôbò bààkamòna Mutooto Wèndè. Ne bôbò bàvwa beena meeji, bàà meeji matwè. Bàvwa mu citùpà cya maalu a mamanya a butèndeleele. Ne bôbò bàvwa bamanyè ne, pàvwà mitooto ayi yifika mwaba awu, Maasiyà ùvwa mwaba kampànda. Kàdi apa, mwaba mwine wùvwà wùkèngelà kwikala mucimanyè awu, kawùyikù mumanyè kantu nansha kàmwè pa Cyòci to.

²³⁴ Ndi mufwànyine kudifwànyikijila ne, bàna bàvwa biimàne mu mùsèsùsù, bàmba ne: “Ha! Tàngilàayi cyàcya. Ha!

S'mmusumbà wà bakoleshi bàà maalu's. Bâtèlèlèjaayi, bàmba ne: 'Ùdi penyì, Udi mulediibwe Mfumu wa beena Yudà awu?' Kî mbamanyè ne Helòdòdè ngudi mfumu muneemu emu to. Kî mbamanyè Mwèpiskòpò *Kampànda* to." Kaa, ekèlekèlè!

235 "Ùdi penyì Udi mulediibwe Mfumu wa beena Yudà awu? Tudi bamòne Mutooto Wèndè mu Esètè."

236 Bàmba ne: "Lwâyi apa, nwênù bônso beena meeji, bàà muneemu abu." Uh-huh. "Lwâyi apa. Nudikù nwênù bônso numòna Mutooto mwaba kampànda anyi?"

"Kaa, kacya mèmè ncitukù mwanjì kumòna cintu cya bu Cyôci aci to."

237 "Nwênù bônso balongi bàà mabùlungà a muulu lwâyi apa. Nwênù bônso aba nuwakù bamòne Mutooto mu mwaba kampànda anyi?"

"Bwǎlà. Bwǎlà."

"Nudikù bamòne cintu cyenzè bu cimanyinu cya mushindu kampànda cya kacyi cyùmvwika anyi?"

"Bwǎlà. Twètù katùtu tumòna cintu bu nanku to. Bwǎlà."

238 Nansha mpidyewu, kabèèna bàcimòna to. Cintu cimwecimwe aci. Kabèèna bamòna cintu nansha cimwè to. Kabèèna mwa kuCimòna to.

"Uh, twǎnjìbi kubìikidisha ba—bambi. Kàdi bishi nwênù bônso aba?"

"Bwǎlà. Katwènakù bamòne Mutooto to."

239 "Ee, kàdi nwênù bàtù bàtàngilà díbà, ku cimanu eku aba? S'nutu nubandila mitooto. Kacya nukàadikù bamanyè. . . Nwênù's nutu bamanyè kasumbù kónso kàà mitooto kàtù mu maulu. Nutu bamanyè mutooto wónso. Nudikù bamòne cintu kampànda anyi?"

"Bwǎlà. Katwèna bamòne cintu to." Kàdi's Cìvwamù.

240 Butùmbì kùdi Nzambi's wè! Kaa, ekèlekèlè! Kanwènaayikù mwa kuCimòna anyi? S' Cìdimù mpidyewu, kàdi kabàyikù mwa kuCimòna. N' Cìtùngùnùke, anu mu nyungulukilu wabò, kàdi bôbò kabàyikù mwa kuCimòna to.

241 "Bwǎlà. Katùvwakù bamòne cintu to. Kaa, mèmè's mvwa muyè kuntwaku. Ncìvwakù mumòne cintu to." Bushuwa's, nwênù kanwèna numòna to. Batàmbe anu kwikala bampofò. Kî mbwalu bwènù nwênù bwa kuCimòna to. Nwamònu anyi? Panwikalà bampofò bàà mushindu awu, mòna's, bushuwa, kanwàkuCimòna to.

242 Cidi anu bwa aba bàdì Nzambi muswe kuCìbuulwila abu. Bôbò abu mbàdì bàCimòna. Bitu misangu yónso anu mushindu awu. Bushuwa.

243 Noà nguvwa mwa kumòna mvùla muulu mu maulu, nudi bamanyè's, kàdi bakwabo abu kabàvwa mwa kumumòna to. Nwamònu anyi? Kabààkamòna mvùla muulu amu to, kàdi Noà yèyè wàkamumòna.

244 Abraham ngwàkamòna Sarah mwambùle mwànà awu. Ncya bushuwa. Kì mbaseki bàakambà ne: “Taatu wa matunga, bânà biine baùkaadi naabò mpindyewu mbàngà?” abu to.

245 Mushindu mwine wutùdi bafwànyine kwendakana mu Bible mujimà, beena meeji ne bapròfetà, ku ntwàdijilu too ne ku ndekeelu's wè! “Diitabuuja ncileeji cya bintu bìdì kabiyi bimwènèka.” Mbamanyè ne Dìyì ndicyàmbè, nenku's ki cyòci aci. Cileeji cyàci ncyòci eci. Bàdi bàcìmòna. Mpindyewu mònaayi. Kaa, ekelekèle!

“Beetu beena meeji bôbò kabèèna bà mòna awu Mutooto to. KaWèna ne bwa nsongo to.”

246 Bwa cinyi? Mu bushuwa bwa bwalu, pàvwàbo bènda bàkèba apu, ne pàakabwelàkanàbo ne kasumbù kàà mushindu awu aku, Mutooto awu's wàkajìmina.

247 Bya mwomùmwè leelu ewu. S'ki cìdì cijìma Bukènkè misangu yàbùngì ncyòci aci, ncya bushuwa, nkwikala baswikàkàne ne kasumbù bu nanku, bàdì kabàyi nansha bàCiiitabuuja to, twamb'eku twamb'eku. Kàdi mmunyi mutwàpetà didisanga dya—dya maèkèleeziyà? “Mmunyi mutwikalà mwa kwendela pàmwè katùyi bapungè dìyì?” Mmunyi mùdì bwobùmwè bwa...bwa cyòci eci kaaba aka, bwa buloba bujimà, ma—maèkèleeziyà ònsò, ekeleeziya ya buloba bujimà misanga? Mmunyi mutwàdisanga, patùdì bashiilàngàne ntàntà wa miliyò ya kilòmèètà? Nwamònu anyi? Mmunyi mutwàcyènzà? Beena Evanjeliyo biine bàdì neetu abu, ne *bikampànda*, ne *bikansanga*, ne *bikankènga*, ne bònsò pàmwè, kàdi biikàle badisangè ne musumbà wà dinyanguka wà mushindu awu.

248 Nzambi ùdi wàngata Mukàjì udi mukezùke, wa cijila, kàyi musambakaja to, udi ushààla ne Dìyì Dyèndè. Eyo.

249 Bundù bwa Yesu bwa bwalu bwa Dìyì. (Ne pashiiishe netwimanyikè, mu katanci kakese cyanàànà.) Yesu wàkafwishiibwa bundù bwa bwalu bwa Dìyì. Tàngilàayi kùneeku. Mmunyi mwàkafikàYe ku ditwàla bundù, Pèndè ne Bunzambi, Nzambi mwandàmùke mubidi? Yèyè's ùvwa Nzambi, Yèyè mwine, muvwijiiibwe mubidi.

250 Mpindyewu, s'nudi bamanyè ne mmùdì Bible mwambè. “TwàkaMulenga ne byanza. Banjelo bààkaMumòna.” Anjì elààyibì meeji ku cyòci aci. Ngeela meeji ne Timòtè ngudi mufunde cintu cya mushindu awu. Nwamònu anyi? Cya ne: “Kakùyì dipangakanangana to bwalu busokoka bwa difwànà dya Nzambi mbunene; bwalu Nzambi wàkamwèneshiibwa mu mubidi, mumòna kùdì Banjelo.”

²⁵¹ Banjelo bàvwapù ku dilediibwa Dyèndè. Mushindu mwine wùvwà Banjelo ne cya kwikala batàngile panshi ne basànke, pààkatàngilàbo panshi mu cidiilù amu ne kumònabò Nzambi mwandàmùke mubidi. Amen. Kabyèna bikèmesha to mwàkabangàbo kwela mbilà mikolè ne: “Leelu ewu, mu nsesa ya Davidi, mbalelè Kilisto Musùngidi.” Banjelo bàakasànka, ne bààkatuutakaja mapwâpwà àbò manene awu, ne pa tukùnà twa Yudaàya apu, kwimbabò ne: “Butùmbi kùdi Nzambi mu myaba mitùmbùke, ditalala pa buloba, ne meeji malenga kùdi bantu.” Bààkamòna Dîyì dya Nzambi, Divwàbo bàtàbàleela, bwa kuDimònabò dimwènèshiiibwe. Kàdi’s ki Dyôdi adi.

²⁵² Mpindyewu, Sàtaanà kàvwa mwitàbùùje aci to, nudi bamanyè’s. Yèyè wàkamba ne: “Wèwè ní Udi . . .”

Mwanjelo wàkamba ne: “NcidiYe.” S’ki dishiilangana ndyôdi adi.

“Wèwè ní Udi, enzàbi *cikampànda*. Twǎnjì kumònabi Ucyènza.”

Kàdi Mwanjelo wàkamba ne: “N’Yèyè awu mwaba awu.”

²⁵³ Beena meeji ne maalu àbò a mamanya a butèndeledi awu, kwambabò ne: “Yèyè ùdi mwaba awu.” Amen.

²⁵⁴ Ki bwa cinyi balongi bàà bintu bya kale bya mwinshi mwa buloba ne bikwabo leelu ewu bàdi bàjuula bintu ebi, bìvwà byambiùbwe mu cipròfetà kùkaadi ndambù wa bidimu ne, bìvwa mwa kwenzeka. S’ki bòbò aba, munkaci mwa kubijuula. Kacya kabàtukù nansha banji . . .

²⁵⁵ Kakwènakù bwalu-bulonda bùkaadiku bwambè ne Ponsiyo Pilaatù ùvwakù pa buloba to. Nuvwakù bamanyè nanku anyi? Bàmwè bàà ku nwènu bànà balongi ngambilaayikù mwaba mu maalu-malonda wùdibo bambè ne Ponsiyo Pilaatù ùdikù. Ne beena bupidyà bàdi bàciseka ne bàcyèlulwila, bàmba ne: “Kacya kakùvwakù mfu—mfumu wa bukalenge bwalàbàle bwa beena Loomò dîna dyèndè, ngu—nguvènà dîna dyèndè ne, m’Ponsiyo Pilaatù to.” Kàdi kwènji mbingu mitwè ku yisambo, mbajuulè dibwe dya mu ditumba adi ne: Ponsiyo Pilaatù, nguvènà. Kaa, ekèlekèle! Macimbu kaayi!

²⁵⁶ Bààkamba ne: “Kacya kakùtukù Ramsès mu maalu-malonda to, Ramsès mukòokeshi wa Èjjiipitù awu.” Kàdi mbajuulè dibwe kampànda, mu dilonga dya bintu bya kale bya mu buloba adi ne: Ramsès, mwibìdi. Mònaayi.

²⁵⁷ Ne bààkamba ne kacya bimanu abi kabyàkuupukakù to. Balongi bàà bintu bya kale bya mu buloba bàvwa bumbula, nenku, katanci aka anyi, kujuulabò, mwinshi menemene mùvwà bimanu byupùke mu Yelèkò, nudi bamanyè’s, pààkadilà mpungi ayi apu. Bàvwa bàmba ne: “Cìvwa anu bwalu bukwàtakaja cyanàànà, musambu wùvwà muntu kampànda mwambè, mwimbè kale wàwa.” Eyowa. Museki ngudi mwambè

nanku awu. “Civwa anu bwalu bukwàatakaja cyaanàà. Kacya kakùvwakù cintu pààci ne mbimanu byupùke to, ne Yoshùwà wèla mpungi, ne ùnyeemena lubilu too ne ku bimanu abi pààbi byumba byùpuka. Kacya cintu bu nanku kacivwakù to.” Kàdi mwena Kilisto munene kampànda mulongi wa bintu bya kale bya mu buloba wàkatungunuka anu ne kuumbula, bwalu ùvwa mumanyè ne bìvwa ne cya kwikala nanku. Kuumbulayè too ne mu mètres bu dikumi majimà, mwinshì kupita pàvwà bakwabo abu apu. Ki bimanu mbyòbi abi, byambàkànàngàne, anu mwàkambà Diyì amu.

²⁵⁸ Bààkamba ne: “Kakùvwakù cintu pààci ne n’Davidì wimba cisanjì, lùnkòmbè lwà nshinga to, bwalu bisanjì bya nshinga kabìvwa bimanýike to anu too ne ku bidimu bya cinunu ne nkàmà yitaanu.” Bààkamba ne: “Kakùvwakù cintu cya nanku to.” Bbeena Kilisto balongi bàà bintu bya kale bya mu buloba kuumbulabò, mu Èjiipitù mwàmwa. Kùkaadi bidimu binunu binaayi, kùkaavwa bisanjì bya nshinga. Amen. Kaa, ekèlekèle!

²⁵⁹ Bààkamba, bwa bânà bàà beena Ebèlù bàvwà bènza mabwe ne bintu bya mushindu awu, bàbyènza ne bisoosà ne: “Kakùvwakù cintu bu nanku to.” Balongi bàà bintu bya kale bya mu buloba kuditwabò mu dyumbula kuntwaku. Bààkapeta cinyì? S’mmaalu a mamanya awu. Bààkapeta cinyì? Bimanu bya cimenga byàkiibakàbo kùdi beena Ebèlù, mulongo wà kumpàlà wà mabwe àvwà matèèkùibwe bìvwa mbisoosà bile; mwibìdì wùvwa wà bikolakola bikòsa mu tutùpà tukese menemene; ne mwisàtù kawùyikù ne bisoosàmu to, nansha kakese. Kaa, ekèlekèle!

Matungà àdi àkòsoloka, Izaleela ùdi
ùtàbuluka,
Bimanyinu byàkadyànjlilà bapròfeta kwamba.

²⁶⁰ Eyowa’s, mukalenge. Byònsò abi mbilwè too ne kutùdi, mwanèètù wa balùme, mwanèètù wa bakàjì. Bìdi nanku bwa cinyì? Munda mwa bidimu bikese bishààle ebi, kacya beena maalu a sèndèmà kabàtukù benzè cìdì cyenjìibwe eci to. Ku lumwènù lwà bindidimbì kùdi kùlwa bwalu-bulonda bwa *Mikenji Dikùmi* ya Cecil DeMille. Ku lumwènù lwà bindidimbì kùdi kùlwa nsòmbelu wa Yesu Kilisto wa kùdi *Ben Hur*. Ku lumwènù lwà bindidimbì kùdi kùlwa *Mulòbi Munène*, dikùdimuna dya mucimà dya Peetèlò. Ne manàyì ònsò a butèndeledi, àdi nsèndèmà mibènge, ne mikooyishe, ne miimànshe aa. Kàdi, Nzambi, mu bukolè Bwèndè bunene, mmubipàtùle anu kubipàtùla, anu bu dikùbakùbà.

²⁶¹ Patùdi twakulangana apa, bintu bitu byambìibwe kùkaadi ndambù wa bidimu abi, kùdi musadidi mupèlè, mukese mudipwekèshe, wa Nzambi, mèmè mwine ewu, mèmè kwamba ne: “Kùdi Bukènkè bùvwà bwimàne ne bwakùle naanyì, ne bungambile bintu bya dyenza.” Bantu kuseka e kwambabò ne:

“Mutù mmumunyùngùlùke ndambù.” S’ki fòtò waBù wàwa. Maalu a mamanya’s ngàdi maBùkwàte fòtò. Bùdikù. M’Bulelèlà.

Mémè kwamba ne: “Mukàjì wàwa mmubwikila kùdi mundidimbì wa lufù.”

262 Kwambabò ne: “Bwa ne mmundidimbì, mpindyewu, aci’s mmacimbu. Yèyè ngudi udifwànyikijilabì mu meeji.”

263 S’mfòtò waci wàwa. Nzambi neèleshè mabwe mbilà. Yèyè ùdi ne bukolè bwa kwenza cidìYe muswè kwenza.

264 Yesu, bundù bwa bwalu bwa Dîyì. Mwanà wa Bunzambi wa Nzambi awu mwimanè mwaba awu, Emanùwèlè, bundù kaayi’s wè! Ùlekele ngènzàmpèkààtù mwena bupidya awu ùMuswika, ùMutwila matà mwisù, ne ùMutùùla manza a myedi, ne ùMwela kadyòmbò kàà kwenza nî ncinyì ní ncinyì pa bwalu abu. Bundù bwa bwalu bwa Dîyì! Uh-huh. Cinyì? Bwa kuuja Dîyì dya Taatù. Kaa! Kàdi, vùlukàayi ne, Yèyè ùvwa ne cya kutwàla bundù bwa lufù. Nzambi, Udi kàyi mwa kufwà, ne Umwèpelè uvwakù mwa kufwà bwa kusùngila ngènzàmpèkààtù awu. Kàyi mukwabo, kàyi mupersona mwibidì anyi mupersona mwisàtù, uvwa mwa kucyènza to. Nzambi Yèyè mwine ki Umwèpelè udi mwa kucyènza. Kàdi’s ki Yèyè uvwa mwaba awu ewu.

265 Yèyè wàkamba ne: “Kakwèna muntu nansha umwe ukààdikù mubànde pa kuumusha Ewu udi mutùùlùke, Mwanà wa muntu mene udi mpindyewu mu Dyulu awu.” Amen.

266 Bààkamba ne: “Baataatù beetu’s bààkadyà manà mu cipeela.”

“Kàdi’s mbafwè bònsò,” mwàkambàYe.

“Nenku Wèwè udi wamba mÛdì Dyàmpà dya Mwoyi?”

267 KwambaYè ne: “Kumpàlà kwa Abraham kwikalayè, NDI. Mémè ndi Dyàmpà dya Mwoyi. Mémè ki NDI awu.”

268 Bòbò ne: “Kùyì ne bidimu makumi ataanu to, kàdi wamba mÛdì ‘mumòne Abraham?’”

269 Yèyè ne: “Kumpàlà kwa Abraham kwikalayè, NDI.” Kadi pashiishe ùlekelà bangènzàmpèkaatù bàMuswikà’s, ekeleeziya wa cyena-màngumba, bàMuswikà.

270 Nudi bavùlùke’s, mu ditùkù dya ndekeelu, ekeleeziya mubanji wa Laòdikiyà ewu, mbaMwelè ne pambèlu mene’s, pàà ekeleeziya. Nudi bamòne kùkaadibi mpindyewu anyi? Nudikù mwa kumòna bwa cinyì ndi ngeela mbilà ndwisha ndongolwelu awu anyi? [Disangisha didi dyàmba ne: “Amen.”—Muf.]

271 Yesu wàkalekelà bangènzàmpèkààtù bàMuswika bwa cinyì? Cìvwa mbwà kuuja Dîyì, kwela Nzambi bundù pambidi, ùfwa. Bìvwa bikèngela Nzambi àfwe. Bìvwa bikèngela bwa kwikalayè mubidi, bwa àfwe. Ne Yesu ùvwa mumanyè nanku. Yèyè wàkabàmbilaci. Wàkamba ne: “Shimbùlaayi ntempèlù ewu, ne Mémè nèmмуjuulùlùlè.” Kì mmuntu

mukwabo ùmujuululula to. “Mémè nēmmujuulùlùlè. Mu matùkù asatu, Mémè nēmmwalùjùlùlè. Mushimbùlaayi; Mémè nēmmujuulùlùlè. Anu mùvwà Yona mu difù dya mushipa wà bàlenà, munda mwa matùkù asatu a muunya ne a bufùku amu, ki mwikalà kabidi Mwànà wa muntu mu mwoyi wà buloba.” Kàdi kabàakacyùm vwa nansha kucyùm vwa mene to. Nwamònu anyi? Bundù bwa bwalu bwa Dìyì, Yèyè—Yèyè guvwa aci.

²⁷² Mpindyewu, bàsekiibwa too ne ku lufù, bwa kubìikabò cyàkàbìdi bwa Mwoyi wà Cyendeleele. Bìvwa bìkèngela dyàmbedi Àshipiibwè, bwa Wàmòna mwa kujuuka bwa Mwoyi wà Cyendeleele, ne kufikisha muntu mukwabo yònsò (uvwa mu mmwènekulu Wendè awu) ku Mwoyi wà Cyendeleele, uvwa mwa kuWìtaba awu. Nwamònu anyi? Yèyè wàkalwa muntu, kulwa cilongo Cipikudi, ne bìvwa bìkèngela àtwalè bundù bwa disekiibwa dyònsò adi, ne dyelulwidiibwa dyònsò adi, anu mwàkenza basadidi Nendè bààkaMudyànjidilà amu. Bu Mòsà, bu Noà, bu bakwabo bònsò bààkatwàlà disekiibwa abu, bìvwa bìkèngela bwa kutwàlaYè disekiibwa. Bwa cinyi? Yèyè ùvwa ne Dìyì, ne Yèyè ùvwa Dìyì. Ki bwa cinyi bààkaMuseka kutàmba bya kacya kwònsò aku. Yèyè ùvwa Nzambi ne Dìyì Diine. Aleluuyah! Ki civwà cyenzè bwa kwikalaYè nanku.

²⁷³ Yesu wàkamba ne: “Nwènu beena lubombo aba.” Yèyè ne: “Nudi nwibaka nkità ya bapròfetà, ne nwènu mbàdi babèlèmu. Bòbò bàvwa bàlwa ne Dìyì dya Nzambi, kàdi nwènu kanùyì nubìitabuuja to. Nudi bapìile bwa yònsò wa kùdìbo.”

²⁷⁴ Mu Phoenix, bu Nzambi mwa kwanyisha, nèngàmbè dìyì kampànda ditùkù adi, nēmfundè lukòngò elu bwa dishipa dya Yesu Kilisto, bàMupoopela cyàkàbìdi pa nkùrusè, nèntwalè cilumbù kumpàlà kwa kasumbù kàà bambi aku, bu Nzambi mwa kwanyisha. Mbapìile bwa Mashi a Yesu Kilisto, bwa diMupoopela dya pa nkùrusè cyàkàbìdi. Eyowa’s, mukalenge. Kufùnda anu nsangilu yònsò awu!

²⁷⁵ Peetèlò wàkabàfùnda, mu Ditùkù dya Mpenta. Wàkamba ne: “Nwènu ne byanza bya lwonji nudi bapoopèle Mfumu wa Mwoyi pa nkùrusè, Udi Nzambi mujuulè ku lufù. Twètù tudi bantèmù.” Wàkatwàla cilumbù.

²⁷⁶ Nèngàngatè Dìyì dya Nzambi, mfundè dingumba ne dingumba dyònsò didiku, ne muntu yònsò udi pa buloba, udi mupìile ku Mashi a Yesu Kilisto awu. Nzambi ànkwàcishèku bwa kwikala mulumbulwidi Wendè ditùkù adi. Amen. Eyowa.

²⁷⁷ Kaa, baseki bààkaMwelulwila. BààkaMwela bundù pambidi. Yèyè wàkashààla anu naaCi. Amen. Kaa! Tàngilàayi cyàkenzàYe. Yèyè ùvwa Mwànà wa Nzambi, kukènga dikèngà dya lufù bwa wàmòna mwa kushipa lufù. Byàkakèngela bwa kwenzaYè nanku. Awu. . . Ki mushindu wùmwèpèlè wùvwàlu lufwànyine kushipiibwa. Nenku kwenzaYè cyòci eci, ne kucitwàla, bwalu bakwabo bònsò bàakacyenza.

278 Bwalu, bônso kale wàwa bàvwa ne Dîyi dya Nzambi mu bukesse bwàdi. Bwalu, Yesu wàkamba nanku. “Dí—Dîyi dya Mukalenge divwa dilwa kùdi bapròfetà. Ne nganyi wa kùdibo,” mwàkambàYe, “uvwa baatatwènù, ntèdeleelu wenù mudilongolwela awu, kabàyi baasè mabwe bashipè? Nganyi wa kùdibo wàkaakidilakù bapròfetà abu? Pashiishe nwènù nudi nubii bakila nkità paanyimà pàà bôbò bamanè kufwà.” Yèyè ne: “Nwènù nudi’s bapiile pa kubèèlamù.”

279 Pashiishe kubèèlela Yè lusùmwinù lwà budimi bwa mvinyò bufila mu difucila, ne basadidi balwè. Bôbò kubàkèngesha, pashiishe ndekeelu wa byônso kwambabò ne: “Bwa mpindyewu netùshipè mwânèndè, bwalu yèyè ngudi mupyànyi.” Nwamònu anyi? Kaa, kufiikabò munda pàakamònàbo aci. Nwamònu anyi?

280 Kàdi byàkakèngela bwa kutwàla Yè bundù. Kàdi ki Yèyè ewu mulekèle bàMuswika, bàMulombola too ne ku lufù, bwa kushipiibwa, bwa kwaluja Mwoyi wà Cyendeleele. Butumbi kùdi Nzambi! Kaa, mushindu mwine wùndi mèmè ewu muMunangè’s wè! Kwaluja Mwoyi wà Cyendeleele ne kujuula mwànà yônso wa Nzambi, mu cikondo cyônso, wàkiimana ne Dîyi adi ne kwambula bundù. Ncya bushuwa.

281 Bu Yèyè kàyi mulwè to, Noà kàvwakù mwa kubiiika ku lufù to. Bu Yèyè kàyi mulwè to, Eliyà kàvwakù mwa kwalukila to. Bu Yèyè kàyi mulwè to, Noà kàvwakù mwa kubiiika ku lufù to, bu Yèyè kàyikù. . . bu Yèyè kàyi mulwè to. Bwalu, Yèyè nguvwa Mwànà wa mukooko mudyànjila kulongolola, wàkalwa bwa kwambula bundù abu pambidi Pèndè Yèyè mwine awu, ne kufwà lufù bwa Dîyi ne Dîyi dyônso dya Nzambi divwà dyambiibwe, ne divwà bantu baakàne aba batwè nyama ku mikòlò adi. ByàkaMukèngela nanku. Mukwabo nansha umwe kàvwakù mwa kucyènza to. Nzambi Nkàâyendè, nenku Yèyè kulwa kwangata kaaba aku, bwa Wàmòna mwa kupikula ne kufila Mwoyi wà Cyendeleele kùdi mwànà yônso wa Nzambi uvwa mutwè Dîyi dimwedimwe adi nyama ku mikòlò ne mwanyishe kutwàla bundù abu awu. Mwànà yônso wa Nzambi, mu cikondo cyônso, uvwa mwanyishe bwa kutwàla bundù abu awu, kakùvwa muntu nansha umwe uvwa mwa kumupikula to, kàdi ku diitabuujà yèyè wàkamòna Mupikudi awu ùlwa.

282 Yobò wàkaMumòna. Yobò wàkiimana kuntwaku, ne bôbò bàakamba ne: “Kaa, wèwè udi ngenzàmpèkààtù wa mu musokoko. Nzambi ùdi anu ùkukèngesha, bwalu udi ngenzàmpèkààtù wa mu musokoko.”

283 Yèyè kwamba ne: “Ndi mumanyè ne Mupikudi wanyi ùdi ne mwoyi. Ku matùkù a ndekeelu Yèyè neìmanè pa buloba. Nansha misàndà ya mu dikòba mibùtùle mubidi ewu, kàdi, mu mubidi wanyi mèmè nèmmonè Nzambi.”

284 Mukàjèndè kwambayè ne: “Bwa cinyi kùyikù uMwela mulawu ufwà mwine?” Yèyè ne: “Wèwè’s ukàadi ne mmwènekèlu wa mukèngeledi wa luse.”

285 Yèyè ne: “Wèwè’s udi wakula bu mukàji mukùtàkàne.” Amen. Ki Yèyè awu’s. “Mémè ndi mumanyè ne Yèyè ùdi ne mwoyi, ne Yèyè neimanè mu Ditùkù dya ndekeelu.”

286 Bu Yesu kàyi mulwe to, Yobò kàvwa mwa kwikala mupikùdiibwe to, bwalu Yèyè nguvwa Mwànà wa mukooko mushebeya kacya ku difùkà dya dyulu ne buloba. Úvwa mumanyè kaaba Kèndè. Úvwa mumanyè pàvwàYe mwimànyine.

287 Ki kabingilà nkòkò aku, Màriyà wàkajingulula kaaba aku, ditùkù dyàkapàtukàye muntwamu adi. Kwambayè. . . “Bu mémè. . . Bu Wèwè kaaba aka, nùnkù mwanèètù wa balùme kí mmufwè to.”

KwambaYè ne: “Mwanèènù awu’s neàbiikè ku lufù.”

Yèyè ne: “Eyowa’s, Mukalenge, mu dibiiikà dya ku lufù. Yèyè ùvwa nsongàalùmè mwímpè.”

Yesu kwambaYè ne: “Kàdi Mémè’s NDI dibiiikà dya ku lufù adi. Udi witabuuja nanku anyi?”

288 Yèyè ne: “Eyowa’s, Mukalenge, ndi ngiitabuuja ne Wèwè udi Mwànà wa Nzambi uvwa ne cya kulwa pa buloba awu.”

Yèyè ne: “Nudi bamujiikè penyì?” Kaa! S’ki bwalu mbwabù. Um-hum.

289 Kucijingululayè. Mukàji mutekète awu kàvwa wàmba nanku cyanàànàto. Úvwakù ne démons mwandamutekète yìvwà miipàciibwe munda mwèndè. Úvwa mumanyè bukolè bwa Nzambi, bùvwà mwa kuumusha maditàmishi ne lutàtù lwà mu meeji ne bikwabo byònsò, munda mwèndè, bùvwà mwa kuumusha munda mwèndè, nyuma mukese wa citù cya ku cilongelu citùmbùke awu, ne kumuvwija cifùkiibwà cipyacipyà. Yèyè ùvwa mwipàte démons mwandamutekète. Bakàji abu bàvwa bamanyè cìvwàYe, bôbò bàvwà baMwitàbe abu.

290 Mbamanyè cìvwàYe mufwànyine kubènzela. Ki mùdìbo kabidi bamanyè, leelu. Anu kuciitaba cyanàànà. Ki cintu cidì cilondà ncyôci aci.

291 S’ki Yèyè awu. Mukàji awu wàkamba nanku. Ki Yèyè. . . S’nudi bamanyè cyàkenzekà. Kaa!

292 Bònsò bàvwà mwa kukènga bwa Dìyi dimwedimwe adi abu, bwa bwalu abu mbwàkafwilàYe. Yèyè ùvwa Umwèpelè uvwa mwa kufwà, bwa kucyènza, bwalu Yèyè ùvwa Dìyi. Úvwa Dìyi, Dìyi dimwènèshiibwe. Bakwabo bònsò bàvwa bapetè tuudiinyijibwa tukese, kadi’s ki kaabujimà kàà Nzambi nkòkò aka, munda Mwèndè. Cìmwècimwè aci ncìdiYe leelu. Ebèlù 13.8: “Yesu Kilisto, umwèumwè awu makèlèlèlè, leelu too ne kashidi.” Tèelejàayi.

293 Nkààdi njikija, cya bushuwa. Nèngènzè nanku, bikèngela anu ngènzè nanku. Ngápìcishi díbà bikolè be.

294 Kacya Kàvwakù mufunde mwakù nansha wùmwè to. Ùvwakù mufunde anyi? [Disangisha didi dyamba ne: “To.”—Muf.] Kàvwakù mufunde mwakù nansha wùmwè to. Bwa cinyi? Yèyè ùvwa Dîyi. Ùvwa cinyi? Mèyi àkaavwà mafunda awu, Yèyè ùvwa dimwèneshiibwa dya Dîyi adi. Butùmbi’s wè! Yoyöyò! Mpindyewu ngädyümvù bîmpè. Yèyè ùvwa Dîyi. Kabivwakù bikèngela bwa kufunda Yè cintu nansha cîmwè to. Yèyè ùvwa Dîyi, Dîyi difunda edi dimwèneshiibwe. Butùmbi kùdi Nzambi’s wè! Yèyè ùdi umwèmwè awu leelu, makèèlèlè, leelu ne kashidi. Yèyè ùdi Dîyi, Dîyi dimwèneshiibwe.

Wèwè udi wamba ne: “Aci ncyà bushuwa anyi, Mwanèètù Branham?”

295 Tàngilàayi mùvwà Yehowah mwimàne kwàka ùpwidija kajila munkaci mwa mavwala awu kuntu kwàka, bwa kupengela Izaleela njila bwa kupìcilamù.

296 Tàngilàayi Yehowah mu mubidi, wamba ne: “Ditalala, pùwa.” Pàvwà mavwala awu àkadituuta mu myelelu, mu cipeepèlè cicolè aci, ne dyabùlù ùnyangakaja byònsò, mushindu ewu apu, Yèyè kwamba ne: “Ditalala, pùwa.” Ki kuMutùmikilaci; mpeepèlè ne byònsò abi. Yèyè’s ùvwa Yehowah. Amen.

297 Yehowah uvwa mwa kwimana kuntu kwàka ne kumyaminakù ndambù wa mamata a lumuma, wàkaamacisha panshi ne kuvwijiiibwawù màmpà, bwa kudiisha cisàmbà awu.

298 Yèyè wàkiimana e kwangata mishipa yitaanu, anyi, màmpà àtaanu ne mishipa yibidi, e kudiisha binunu bitaanu.

299 Yèyè ùvwa Dîyi. Amen. Amen. Yèyè ùdi Dîyi, ne Yèyè neikalè Dîyi díbà dyònsò. Nenku bwànyì mèmè ne dikù dyànyì, netùkwacilè Dîyi mudimu.

Kaa, ndi muswè kuMumòna, muswè kubandila mpàla Wendè,
Kwòkù aku kwimba bwa kashidi ngàsà Wendè musungidi;
Mu misèèsù ya mu Butùmbi, mbandishè dîyi;
Pìikalà ntàtu yònsò mipìte, ndekeelu wa byònsò mwalùkile kumbèlu, bwa kusànka kashidi.

300 Kaa, ekèlekèlè! Eyowa. Twàla bundù bwa Dîyi. Kùdi bundù kampàndà bùtù bwènda pàmwè ne Dîyi. Shààla wèwè anu ne Dîyi, ne twàla bundù abu.

Tùsambilàayi.

301 Yesu, mùvwàbi dilòlò adi amu, Mukalenge, mvwa mwelè lubilà ne: “Éyi Yesu, Udi muswè bwa ngènzè cinyi? Cìndi mwa kwenza ncinyi, Mukalenge? Pa kumòna bintu ebi, ne pa kumanya

dìbà ditùdì ne mwoyi, cìndì mwa kwenza ncinyì, Mukalenge? Cìndì mwa kwenza ncinyì?”

³⁰² Ndi nsambila bwa ekeleeziya wanyì mukese ewu, Mukalenge. Ndi ngeela meeji ku tunyuunyi tukese atu mu cikèenà-kumòna, maalu àdì menzèke; ne nyuunyi mikwabo ayi, bìvwà bintu binène abi. Kàdì kùvwa milongo yàyì yisatu, Mukalenge. Kàdì pààlu Banjelo abu, kakwàkashààla nyuunyi kabidi to. Tuumisànjeelà tukese atu tùvwa tulenga be, Mukalenge, kàdì ndi ngiitabuujà ne kùdì cintu kampànda cìdì pabwìpì menemene ne kwenzeka. Biikalèku nanku's, Mukalenge. Tùfwimbèku ne tùvwijèku mu mushindu Wèbè Wèwè. Twètù tudi—twètù tudi diima. Wèwè udi Mufwìmbi.

³⁰³ Mu mulààdilu wà Noël ewu, Mukalenge, tudi ne kusàkidila bwa dipà dya kùdì Nzambi, bwa mùdì Nzambi mutùpèèshedi. Nansha mùdici ciikàle, mutùdì twela meeji munda mwa mwoyi yetu ne, ndiitabuujà kampànda dya màjimbù dya mu ditùkù didìbò bateetè bwa kucifwimbakaja ne kucìvwija cifwànàngàne ne—ne misà, misà ya Kilisto amu, kàdì twètù katwèna tulwa mu mushindu wà Taatù Noël ne micì ya Noël ne—ne bintu bilengeja awu to. Kàdì tudi tulwa mu Dìnà dya Mukalenge Yesu, bwa kukuukwila Nzambi wa mu Dyulu, wàkandamuka mubidi awu, mubidi bu twètù, ne kusòmbela munkacì mwetu, bwa kutùpikula awu; ne wàkakènga bwa bundù bwa Dìnà, kukènga bwa bundù bwa nkùrusè, bwa kulekela bulongolodi bwa pa buloba kushebeyabù Èmanùwèlè, bwa Wàmòna mwa kutùfikisha ku Mwoyi wà Cyendeleele.

³⁰⁴ Twètù tudi banganyi's, Mukalenge? Twètù tudi banganyi's, bwa twètù kwepela bundù kanà bwònsò ebu? Nzambi, tùvwijèku mäsàlaayi a bukitù. Ndi ndàmbula mèyì aa Kùdì, Taatù. Mmafwanýine kwikala makòsòlòkàngàne; mucyòke ne muzengèle mùndì emu. Kàdì, Taatù, futàku bantu aba bwa mùdìbò basòmbe bàtèèleja. Nenku bukolè bwàkajuulà Mukalenge wetù abu, ne kuMuleeja kutùdì kaaba aka bu Musùngidi, mu matùkù a ndekeelu aa, swàku bùfuulululè nyuma ne nyuma yònsò kaaba aka, Mukalenge, ku diseemena dya Dilwa dya Mukalenge Yesu. Swàku bwa biikalè nanku, Taatù.

³⁰⁵ Ondòpàku babèèdì ne bàdì mu lutàtu bàdì munkacì mwetu. Swikakù mpùtà ya bàdì ne mwoyi micibùlùke. Mukalenge, tudi. . . Tukàadi bapicilèpicile mu byàbùngì, mwoyi wànyì wùkaadi ne bibangu byàbùngì, Mukalenge, bya ku mvità mikolè. Mèmè ndi nkòlomù wa kale. Nkwàcishèku, Mukalenge. Ndi dijingà ne dikwàcisha Dyebe. Pàmwàpa dilongeshiibwa dyònsò edì divwa mbwà kiipàcìlà kampànda. Ndi ne dyeyemena ne mmwòmò, Mukalenge. Nkwàcishèku, Èyì Nzambi. Ne kwàcishàku ekeleeziya ewu. Ne túbènèshèku, bònsò pàmwè.

³⁰⁶ Bèneshàku bânà bakese. Ndi ngeela meeji bwa bààbùngì leelu ewu, bânà bakese, bakese bakwàte ne bya luse biikalà

kabàyi mwa kupetakù kantu nansha kàmwè kuntu kwàka. Nenku ndi—ndi ndòmba bwa Wèwè kwikalakù naabò ne kubàkwàcisha. Bâpèèshèku Mwoyi wà Cyendeleele, Mukalenge. Adi ki dinene. . .adi ki Dipà dya Noël ditùdi tukèba, m'Mwoyi wà Yesu Kilisto bwa kulombola ne kukòokesha mu mwoyi wànyì. Ki dîndi nkèba ndyòdi adi, Mukalenge.

³⁰⁷ Tùbènèshèku, bônso pàmwè mpindyewu. Nyewu tuKulàmbula Méyì aa. Àmatèku mwaba wónso wàmatawù awu, Mukalenge. Mwaba wónso wikalà myoyi myunzulula awu, swàku bwa àtwalè cikondo cimpè cya lupàndu, mu Dîna dya Yesu. Amen.

³⁰⁸ Ewu yónso udi. . .Mbanganyì bàdi baMunangè? [Disangisha didi dyàmba ne: “Amen.”—Muf.] Byòbì biine, kwikala mu dilwijakaja nùnkù anyì? Kaa, mèmè ndi muMunangè! Ndi muMunangè. “Mukalenge, Udi muswè bwa ngènzè cinyì?”

³⁰⁹ Kanùpukù mwoyi masangisha a dilòlòlò edi to. Nwâmanyì mpindyewu cìdi Noël ùmvwija anyì? Kaa, *Eci* ki dyànyì dipà dya Noël. *Eci* ki Dîyì adi. Mukalenge, bu mèmè anu mwa kudilekelakù, bu mèmè anu mwa kudyùmushakù mu njila mu mushindu wà ne Dîyì Dyebe didi mwa kuCìleeja, kuDìleeja Dyòdi diine kupìcila *emu*, aci's ki—aci's ki cintu cya citàmbe bunene cîndikù pàànyì mumanyè.

³¹⁰ Mpindyewu ngeela meeji ne bàdi ne bintu kampàndà bìdìbò baswè kupèèsha bânà. Mpindyewu nèngààlujilè Mwanèètù Neville bulombodi bwa disangisha. Nzambi ànùbènèshè.

Mwanèètù Neville.



BUNDÛ BWA BWALU BWA DfYì LUA62-1223

(The Reproach For The Cause Of The Word)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matùkù 23 a ngondo wa dikumi ne mwibidi, cidimu cya 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org